




登录号 1810193

新編
年譜

本次第...
志...郎...
先...
主...

Kodak Color Control Patches



卷一 10193

夫生之籍

樂榮然而

平韻韻上

然少制

梅邨先生年譜

序

昔人謂少陵之詩詩史也讀其詩而天寶以後興亡治亂之蹟具在其為史之所同者可以相證明焉其為史已所遺者可以相參考焉詩之所以貴有為而作也雖詩關陵之集編體不編年讀其詩而不得其旨更求其生之籍之而其詩之與新舊兩書相出入者乃條分并比映其生無所疑甚矣年譜之有功於詩也我鄉梅村其書不映亦世之所謂詩史也先生負曠世之才為風和官為之斯交游多魁奇俊偉之士而又當明季百六

司
 本次第纂次卷中之作類皆感慨時事悲謔掩抑嗣說石
 卷一即先以

海村先生譜序

時有爲之作讀者或恨其不能盡詳孟子曰誦其詩讀其書不知其人可乎是以論其世也然則非年譜不足以知先生之詩之世非論先生之詩之世不足以知先生之詩之果爲詩史也先生之集有集覽有箋註而年譜闕如同里顧雪堂茂才劬學好古篤嗜先生之詩暇日求里中前輩程迓亭先生所箋編年之本爲年譜一書而又徧考其家牒雜識以附益之積數年之力成書如干卷雪堂以同里後進爲先生編年之譜其蒐采尙易爲力故其書之瞻洽視前人之編杜詩者有加焉蓋

其體之詳畧各有所由來而要其用心之勤爲功於前人之詩以靳致其知人論世之意未嘗不一致也書旣成深佩雪堂之篤雅好事能補前人之所未逮遂不辭而爲之序

道光二十四年歲次甲辰同里徐元潤書

序
詩有年譜由來尚矣昔賢謂少陵詩爲詩史宋魯嘗撰註冠以年譜今註法而譜存紹興中趙子樛亦著杜詩年譜一卷不逮魯譜之密蘇長公集多譏切時事亦詩史也施元之蘇詩註家綿津中丞孫枝復訂正王宗稷東坡年譜於前使人開卷瞭如然則年譜與詩非相爲表裏歟東吳梅村祭酒詩風管道上感均頑艷聚城新氏集覽最爲詳洽吾鄉吳枚菴叟增刪之爲箋註嚴少峰太守梓而行之亦以未見年譜爲憾祇錄陳顧二公撰墓誌行狀謂畧見一斑僕屢欲搜輯成編而未之逮比來司鐸太倉顧君雪堂示所看先生年譜四卷出入斬吳兩註兼摺迓亭程君編年小引本次第纂攷具見苦心並紀世系于前補脫簡于後尤爲無所闕遺喜其篤雅好古能意長即先生之往蹟雖爲功較易而用心較勤其分卷亦較倍益以見祭酒之爲詩史

直可追杜蘇而後先誦誦焉通嚴地甫觀察遠宦龍西將郵政是請附吳君受社本為合璧
余既樂雪堂乃祭酒之功臣尤望地甫為前人克紹箕裘也書此以報雪堂並寄觀察以代
簡 道光乙巳夏日元和宋清壽翁相識

附說簡乃順治十二年己未贈馮誦生進士授雲中十五年戊戌黃觀只五十壽序十六年己亥
丁名某七十壽序十七年庚子月辭疆五十壽序康熙五年丙午江西巡撫韓公奏議序

吳梅村先生世系

同里後學顧師軾景和氏纂

先生姓吳氏諱偉業字駿公晚號梅村江南太

倉州人

七世祖子才名無考河南人元末避兵始遷蘇州

崑山之積善鄉配費氏

六世祖埕字公式以字行明正統元年贈承德郎

行在刑部雲南司主事配陳氏封太安人

致又字
式周

五世祖凱字相虞號冰蘖卒祀鄉賢祠配沈氏繼

沈氏再繼陳氏

蘇州府志吳凱字相虞父公式早亡遺腹生凱
能力學養母里胥嘗召之役詣縣自陳有母不
能遠離竊有志於學縣令芮翀異其言立遣就
學後充貢京師中順天鄉試宣德中授刑部主
事改行在雲南司再改禮部主客司以母老乞
歸遂不復仕凱精敏有治劇才平生以禮自律
言行不苟風儀嚴峻人望而畏之家居四十年
非公事不至公府葉盛尤重之嘗曰鄉里作官
前輩當法吳丈後輩當法孫蘊章及卒鄉人私

諡貞孝先生蘊章各環

葉文莊公盛相虞公墓誌銘祖才父式周母陳

氏公在姪而父亡既生公家復被菑母年尚少
甘貧守約育而教之公晚得子而連得三子卒
成化七年七月十四日壽八十有五配沈氏先
卒子三人長恩輸粟於官授承事郎次惠次愈
女二人婿顧恂龔綬銘曰孰完五福惟善日不
足孰永終譽名不必公與卿吁嗟乎公後有考
於茲銘恂先文康公鼎臣父
高祖愈字惟謙號遯菴配夏氏
蘇州府志吳愈字惟謙凱子成化乙未進士授

南京刑部主事歷員外郎中初凱起家刑曹每
爲愈言折獄之道愈在部繙閱舊牘遂精法律
一時奏讞咸倚以決出知叙州府慶符盜劫縣
治令捕得二十七人已誣服愈疑之乃詣縣辨
審釋二十五人未幾果獲真盜土官安鰲以馬
湖叛衆議用兵愈策曰鰲無遠謀然其甲兵精
利未易敵也彼中無水當重圍以困之議未決
而鰲忽棄城走衆慮其糾諸夷爲亂愈曰彼以
郡守將兵接戰勝負未可知旣離巢穴一窮寇
耳諸夷皆其仇又何能爲因遣人襲之不血刃

而獲自是馬湖改置流官後其黨復劫府印爲
亂愈親抵其巢諭之遂獻印解散在叙九年遷
河南參政致仕歸卒年八十四

王弇州

世貞

吳遜菴贊在郡九年課農桑興學

校戶口滋殖風俗醇美爲諸郡最而業已倦游
矣里居優游自奉養喜賓客和謹得後進心有
女三人歸陸伸文徵明皆名士而歸王氏者有
子同祖以才入中秘皆侍公周旋以是寬樂於
其身贊曰仕不九卿曰上大夫壽不九秩曰八
十餘宅相所貽蘭蕤玉枝父子耆喆爲鄉閭師

先文康公

鼎臣

吳公惟謙墓表卒於嘉靖丙戌

五月十九日年八十四子男四長東浦江縣縣

丞次南國子生公仲弟憲無嗣推以爲後次西

次守中國子生孫男詩訪許誌

嗣高祖憲字維明號靜菴配陳氏無子以愈次子

南爲嗣

曾祖南字明芳號方塘賜內閣中書後官鴻臚寺

序班以使事過家爲御史所論謫江西建昌府幕

官配鄭氏繼袁氏

先生先伯祖玉田公墓表余家世鹿城人自禮

部公以下大參鴻臚三世皆葬於鹿城公爲鴻

臚長子次卽贈嘉議大夫少詹事諱議余祖也

又次則諱誥偉業四五歲曾見及之老且貧衣

食於卜肆余祖嘗抱偉業於膝顧叔祖而嘆曰

爾知我宗之所以衰乎三世仕宦廉吏之橐固

足以傳子孫爾伯祖實主其帑用之爲飲食裘

馬費產遂中落余與爾叔祖庶出也少孤故皆

貧余祖亡後祖母湯孺人每談及鴻臚公時事

輒言嘉隆中鹿城倭難伯祖自以私財募兵千

餘人轉戰湖泖間兵敗左右皆沒得一健卒負

之免家遂以破

祖議字子禮號竹臺以先生貴贈嘉議大夫詹事府少詹事幼贅於瑯琊王氏遂居太倉副室湯氏封太淑人

先生秦母于太夫人七十壽序衰門貧約吾母操作勤苦以營舅姑滌灑之養湯淑人憐其多子代爲鞠育余自少多病由衣服飲食保抱提携惟祖母之力是賴憶自早歲通籍祖母年七十有三及以南都恩貤封三世湯淑人期屆九秩笄珈白首視聽不衰里人至今以爲大息

父琨字禹玉又字蘊玉號約齋又號約叟諸生以經行稱鄉里先生貴封嘉議大夫詹事府少詹事國朝舉鄉飲大賓卒祀鄉賢祠配陸氏繼朱氏封淑人

鈕琇 觚賸江右李太虛爲諸生時嗜酒落拓而家甚貧太倉王岵雲司馬備兵九江校士列郡拔太虛第一引見之謂曰吾固多子擇師無若子者顧遠在婁東子能一往乎李許諾次日卽遣使送至其家時王氏二長子已受業同里吳蘊玉先生蘊玉者梅村先生父也而太虛教其

梅村世系
第四五諸郎兩人共晨夕甚歡梅村甫齠齡亦
隨課王氏塾中李奇其文卜爲異日偉器歲將
闌主家設具讌兩師出所藏玉卮侑酒李醉揮
而碎之王氏子面加譙讓李亦盛氣不相下席
罷後謂吳曰我安可復畱此遂拂衣去吳知其
不能行也翼日早起追於城闈出館俸十金爲
贈乃附賈舶歸然所贈貲大半耗於酒及抵家
垂橐蕭然亟呼婦治具婦曰吾絕糧已久安所
得粟憶君去後猶存故人酒一罌請佐君軟飽
可乎婦往鄰家覓薪李卽發罌罌內產一芝如

盤紫光煜煜喜且愕曰此瑞徵也顧酒敗不可
飲奈何挹之則清冽異常乃浮白獨斟婦負薪
歸則罌已罄矣是秋登鄉薦明年成進士入詞
館數載後以典試復命過吳門王氏子謁於舟
次李急詢吳先生近狀是時梅村亦登賢書因
購吳行卷攜以北上爲延譽京師辛未梅村遂
爲太虛所薦登南宮第一及第第二人年僅弱
冠蘊玉先生享榮養者三十年可爲疎財敦友
之報而岫雲諸子自司馬沒後家漸替矣
先生于太夫人壽序吾母朱淑人精心事佛嘗

于鄧尉山中創構傑閣虔奉一大藏教

嗣祖諫字子猷號玉田官福安縣縣丞葬梅灣配

某氏繼查氏再繼陸氏子一查氏出天本宛平王敬哉崇簡

青箱堂集吳母張太孺人墓誌銘詳後順治丙申年

先生玉田公墓表於吳門遇三山鄭君曰余姻

也詢之則三山之兄曰某者為伯祖婿余姑尚

在也偉業乃具禮幣拜見則年已七十三泣然

泣曰猶憶會鴻臚公葬時曾到鹿城見二叔今

已六十年不通家問二叔謂吾祖也歸而告我

祖母湯孺人孺人泣吾世父與吾父知之亦泣

泣年六十始知有伯姊也相率至梅灣墓下再

拜哭且加封樹焉吾姑後三年以卒有二子以

其一從吳姓主梅灣之祭

嗣父瑗字文玉號蘧菴禮部冠帶儒士配王氏繼

張氏

本青箱堂集詳後順治丙申年

吳梅村先生年譜片
卷一

吳梅村先生年譜卷一



同里後學顧師軾景和氏編

同里後學顧思義仁仲氏訂

故明萬歷三十七年己酉五月二十日先生生

母朱太淑人姪先生時夢朱衣人送鄧以讚曾元

坊至遂生先生

三十八年庚戌二歲

三十九年辛亥三歲

四十年壬子四歲

熊學院科試先生尊人約齋公補博士弟子員

每寸年譜卷一

四十二年癸丑五歲

仲弟 偉節生

四十三年甲寅六歲

四十四年乙卯七歲

讀書江公 用世家塾 先生按察司使江公墓誌

銘始余年七歲讀書公家塾識公公卽是年領

鄉薦後三十年家居公折輩行與余及魯岡游

八月祖竹臺公卒

四十四年丙辰八歲

四十五年丁巳九歲

四十六年戊午十歲

四十七年己未十一歲

就穆苑先 雲桂 家中讀書 先生穆苑先墓誌銘

自余生十一始識君居同巷學同師出必偕宴

必共如是者五十年君爲先大夫執經弟子余

兄弟三人君所以爲之者無有不盡余雖交滿

天下其相知莫如君余之初就君齋讀書也有

同時游處者四人志行純祐爲兄弟魯岡與之

共事其輩行差少皆吳氏余宗也鄰舍生孫令

修亦與焉

季第 偉光生

四十八年庚申 是年八月後改元泰昌 十二歲

天啟元年辛酉十三歲

二年壬戌十四歲

隨父約齋公讀書志衍 繼善 家之五桂樓 先生

志衍傳余年十四識志衍志衍長於余三歲兩

人深相得哭志衍詩余始年十四與君蚤同學

蚤起詩惜爽憇南樓送志衍入蜀詩我昔讀書

君南樓程 穆衡 箋先生幼隨父約齋公讀書志

衍家之五桂樓詩中所咏南樓是也

能屬文西銘張公 溥 見而嘆曰文章正印在此子

矣因畱受業於門相率爲通今博古之學 程 穆

衡 婁東耆舊傳江右李太虛明睿落魄客授州

王大司馬所與公父善見公於髫髻奇之一日

飲於王氏太虛被酒碎其玉卮王有詬言憤怒

去約叟追而贖之太虛曰君子奇才也天如將

以古學興東南盍令從遊乎約叟如其言

三年癸亥十五歲

四年甲子十六歲

西銘肇舉復社先生爲入室弟子 楊 彝 復社事

實文社始於天啟甲子合吳郡金沙橋李僅十
有一人張溥天如張采來章楊廷樞維斗楊彝
子常顧夢麟麟士朱隗雲子王啟榮惠常周銓
簡臣周鍾介生吳昌時來之錢旃彥林分玉五
經文字之選而效奔走以襄厥事者嘉興府學
生孫淳孟樸也是曰應社當其始取友尙隘來
之彥林謀推大之訖於四海於是有廣應社貴
池劉城伯宗吳應箕次尾涇縣萬應隆道吉蕪
湖沈士柱崑銅宣城沈壽民睂生咸來會聲氣
之孚先自應社始也

五年乙丑十七歲

六年丙寅十八歲

七年丁卯十九歲

崇禎元年戊辰二十歲

陳學院歲試入州庠

二年己巳二十一歲

西銘與同里張南郭

采

舉復社成先生名重復社

復社事實崇禎之初嘉魚熊開元宰吳江進諸
生而講藝於時孫淳孟樸結吳翻扶九吳允夏
去盈沈應瑞聖符等肇舉復社於時雲間有幾

社浙西有聞社江北有南社江西有則社又有
歷亭席社崑陽雲簪社而吳門別有羽朋社匡
社武陵有讀書社山左有大社僉會於吳統合
於復社復社始於戊辰成於己巳其盟書曰學
不殖將落毋蹈匪彝毋讀匪聖書毋違老成人
毋矜已長毋形彼短毋以辨言亂政毋干進喪
乃身嗣今以往犯者小用諫大者擯僉曰諾是
役也孟樸渡淮泗歷齊魯以達於京師賢士大
夫必審擇而定矜契然後進之於社故天如之
言曰忘其身惟取友是急義不辭難而千里必

應三年之間若無孟樸則其道幾廢蓋先後大
會者三復社之名動朝野孟樸勞居多然而歛

怨深矣

先生有致雲間同社諸
子書致孚社諸子書

西銘爲尹山大會

陸世儀

復社紀畧吳江合楚

人熊魚山以文章經術爲治慕天如名迎致邑
館於是爲尹山大會茗雪之間名彥畢集遠自
楚之鄆黃豫之梁宋上江之宣城寧國浙東之
山陰四明輪蹄日至比年而後秦晉閩廣多有
以文郵置者

三年庚午二十二歲

李學院科試一等三名補廩膳生員

舉鄉試十二名座主庶子姜曰廣江西新建人萬

歷已未進士編修陳演四川井研人天啟壬戌進

士春秋房房師鎮江府推官周廷鑑福建晉江人

天啟乙丑進士按先生有寄房師周芮公先生詩

西銘為金陵大會復社紀畧崇禎庚午諸賓興

者咸集天如又為金陵大會是科主裁為江西

姜居之曰廣榜發解元楊廷樞而張溥吳偉業

皆魁選

四年辛未二十三歲

舉會試第一名座主內閣周延儒宜興人內閣何

如寵桐城人房師李明睿江西南昌人天啟壬戌

進士按先生有閩園詩座主李太虛師從燕都間道北歸尋以南昌兵變避亂廣陵賦呈八首

詩諸思義李繼貞萍槎年譜辛未會試同考得士

二十一人邊事一策周挹齋屬余為之并問亦

出余手今載錄中是年榜元為吳偉業世通家

也填榜止餘第二第一尚有推敲首揆周諱延

儒偶思吳卷為太倉人係余同里因招余首問

家世以及年貌文望余一一答之甚悉且云行

文直似王文肅公首揆喜大聲徧語同考更首

肯文肅公一語於是遂定吳卷爲第一余因筆記云憶吳之祖竹臺公與先君子爲筆硯交白首相歡其父禹玉受業於余余子又受業於禹玉蓋三世通家矣今日闈中推轂之語雖捧土增山要亦添花著錦余豈貪天功以爲己私耶

李繼貞與門人吳禹玉書去秋得鹿鳴報爲之起舞今春在闈中親見填榜得令郎首冠多士益喜躍不自禁兩相國知不佞同里卽詢家世來歷一一置對兩相國亦自喜慰無量思令先尊與家大夫筆硯一生不得鄉校乃不佞三

入闈得睹桃李之盛而令嗣一飛冲天又不似鄙薄苟然而已此豈非造物之嗇前豐後亦爲善者之必有餘慶與門下自此可收卻書本打帳做大封君若復戀戀雞肋恐作第二人將不免爲令郎所笑善刀藏之何如

殿試一甲第二名授翰林院編修復社紀畧是科延儒欲收羅名宿密囑諸分房於呈卷之前取中式封號竊相窺伺明睿頭卷卽偉業也延儒喜其爲禹玉之子明睿亦知爲舊交之子偉業由此得冠多士烏程之黨薛國觀洩其事於

朝御史袁鯨將具疏參論延儒因以會元卷進
呈御覽莊烈帝批其卷曰正大博雅足式詭靡
而後人言始息

先生入翰林制詞曰陸機詞賦早年獨冠江東
蘇軾文章一日喧傳都下當時以爲無愧

疏劾蔡

奕琛

復社紀畧溥緝烏程通內結黨援
引同鄉諸子繕疏投偉業參之偉業立朝未久
於朝局未練不之應時溫之主持門戶操握線
索者德清蔡奕琛爲最偉業難拒師命乃取參
體仁疏增損之改坐奕琛

假歸娶郁淑人

淑人萬歷庚子武舉李茂女

陳繼儒

送吳榜

眼奉旨歸娶詩年少朱衣馬上郎春闈第一姓
名香泥金帖貯黃金屋種玉人歸白玉堂北面
謝恩纔合登東方待曉漸催粧詞臣何以酬明
主願進關雎窈窕章 張溥送吳駿公歸娶詩
孝弟相成靜亦娛遭逢偶爾未懸殊人間好事
皆歸子日下清名不愧儒富貴無忘家室始聖
賢可學友朋須行時襍被猶衣錦偏避金銀似
我愚 程穆衡先生詩箋單狷菴 恂竹香菴集
吳太史奉詔歸娶睂公屬諸子同賦二律狷菴

警句云鏡邊玉筍人初立屏底金蓮燭乍移又

云梅粧并倩仙郎畫元是春風第一花 先行

人 陳垆 抱桐集祭酒恆言吾一生快意無過三

聲臚唱占雲宮袍曜日帶醒初上奏節戛然錦

晝御輪綺宵卻扇流蘇初下放鉤鏗然海果生

遲石麟夢遠珠胎初脫墮地呱呱然

河決金龍口滕縣沈焉有悲滕城詩

李學院歲試先生仲弟

偉節 入州庠 字清臣

五年壬申二十四歲

西銘假歸為虎邱大會刊國表社集行世 復社

紀畧偉業以溥門人聯捷會元鼎甲欽賜歸娶

天下榮之遠近謂士子出天如門下者必速售

比溥告假歸途中艤首所至挾策者無虛日及

抵里四遠學徒羣集癸酉春溥約社長為虎邱

大會先期傳單四出至日山左江右晉楚閩浙

以舟車至者數千餘人大雄寶殿不能容生公

臺千人石鱗次布席皆滿往來絲織游人聚觀

無不詫嘆以為三百年來未嘗有也 按復社紀畧總綱壬

申張溥給假葬親歸為虎邱大會

六年癸酉二十五歲

約齋公五十初度 張溥 吳年伯母湯太夫人壽
序崇禎癸酉之夏吳禹玉先生五十五者祝
之始也於是邦人聚而獻祝先生讓曰老母行
年七十有五而髮蒼蒼而筋骨甚強天之厚我
母也甚請壽我母太夫人聞之復辭曰惟子富
義行學以康於色惟子有男天發其祥以高大
予門邦人祝子順也勿以老婦爲言夫一家之
中幼讓其長長讓其老則一家和一國之中小
臣讓其大臣大臣讓其君則一國和君子先讓
以明禮斯舉也邦人於先生觀禮焉先生三子

長駿公次清臣幼未有名舉止停諦亦兄敵也
駿公試南宮第一時未娶婦告之天子賜馳節
還里門太夫人擁孫襴笏甚歡爲問都中起居
鬪然而笑手縮其髮飲以醇酒明年駿公成婚
禮一城聚送致賀太夫人憑高軒望新婦入門
燈火夾市復喜謂里母幸及見盛事時太夫人
年七十有四邦人子欲拜酒上壽先生止之又
一年而展觴其說云何人子奉親視蚤夜察顏
色自少逮耄日月漸加苟推其本皆親之年先
生年登五十太夫人善食無恙孰鞠孰育凡先

生之年太夫人所有也先生食貧養志讀邱索
撰蒼素文名震動江介顧遭時遲暮而有子先
見子欲爵父父曰有母在則如何溥曰是又可
以告之天子矣朝廷教孝爵命及士必本父母
駿公幸早貴成大名三歲滿秩奉詔崇所自出
先生與朱太君將被象服如詞臣太夫人其安
之乎在貴思約不忘著簪德媪之素也同體受
命義不敢先令子之分也駿公欲崇先生必先
崇太夫人朝廷欲崇駿公之所生將崇先生太
君必先崇太夫人是一家有兼貴也先生文尚

爾雅當代聲名之士思與並鑣王路屈駿公使
下今秋駕車而南太夫人挽裾弗令前蓋謂功
名鼎達世所炫忌大孫年少兼人次孫筆復抗
大敵搆重器一旦父子俱官將來炎炎之戒是
以邦人知太夫人善訓子孫又稱其達義能止
也先是太夫人七十先生亦嘗開北堂羣宗族
舉觴矣衣冠拜母退而興嘆志在五鼎昔者孔
子之不遇也季孫祿以千鍾南宮項叔乘之以
車二者亦世家所恆有也孔子曰非二子則吾
道不行先生乘高祖之懿德力學嗜道爲世方

聞門室之內上順下睦太夫人持杖升眺歡氣
無間頌說高爵不言而意深駿公既貴歛制益
至自賢母視之適如固有无形損益然白屋之
士通聲巖廊散髮至老非時不顯繇今而論先
生假一遇於駿公以榮太夫人其亦季孫之祿
南宮之車也可謂偶然哉溥又聞吳氏爲崑陽
上族先生祖裔多公卿鉅人曩以瑩兆所蔽黷
黷者五六十年佞人既拔今始強奮一舉而冠
天下正士之出與邪乘除太夫人仰天時察地
脈復詳人事福祿不回其在是夫

王昊焚餘補筆梅村師云余初第時不知詩而

多求贈者因轉乞我師西銘西銘一日漫題云

半夜挑燈夢伏羲異而問之西銘曰爾不知詩

何用索解因退而講聲韻之學按程穆衡先生

山蚤起五月尋山夜寒話雨五
律三首爲少作力辨此說之誣

七年甲戌二十六歲

城隍廟正殿災有重修太倉州城隍廟碑記

八年乙亥二十七歲

入都補原官充實錄纂修官 李繼貞送吳文玉

入京師太史駿公所詩長安各利地君行獨無

琛導之溫體仁所溫意中不知有采先是體仁
欲罷行取啟上因星變青衣布袍齊居武英殿
求直言令淮安衛三科武舉陳啟新上書特旨
擢列諫垣至是乃曰誰爲張采今所急者張溥
耳能併彈治當授官如啟新矣文聲從之事下
學臣倪元珙時社中吳繼善克孝夏允彝陳子
龍皆在京謂文聲必有浙人頤指說之就選出
諸外社局始安乃釀金爲部費使擇善地文聲
與二吳有表戚克孝爲盟約以堅之得道州吏
目以去元珙竟以隱降調繼之山東元瑋瑋艱

歸齊人張鳳翮代之延臨川羅萬藻閱文學政

悉入羅掌握溫無如之何會明年溥卒溫罷相

事得解 復社事實十年正月蘇州民

明史作
太倉州

監生陸文聲疏陳風俗之弊皆原於士子庶吉

士張溥知臨川縣事張采倡立復社以亂天下

思陵下提學御史倪元珙察覈倪公言諸生誦

法孔子引其徒談經講學互相切劘文必先正

品必賢良實非樹黨文聲以私憾妄訐宜罪閣

臣以公蒙飾降光祿寺錄事蘇州推官周之夔

者與溥同年舉進士初亦入社至是希閣臣意

墨經詣闕復許奏溥等樹黨挾持案久未結讞
言罔極至有草檄以伸復社十罪者大約謂派
出婁東吳下雲間學則天如維斗臥子上搖國
柄下亂羣情行殊八俊三君迹近八關五鬼外
乎黨者雖房杜不足言事業異吾盟者雖屈宋
不足言文章或呼學究知囊或號行舟太保傳
檄則星馳電發宴會則酒池肉林至十五年御
史金毓峒給事姜埰各上疏白其事始奉旨朝
廷不以語言文字罪人復社一案准註銷後福
藩稱制阮大鍼怨戊寅秋南國諸生顧杲等一

百四十人之具防亂公揭也日思報復爰有王
實鼎東南利孔久湮復社巨魁聚斂一疏大鍼
語馬士英云孔門弟子三千而維斗等聚徒至
萬不反何待至欲陳兵於江以爲防禦心知無
是事而意在盡殺復社之主盟者時崑銅暨宜
興貞慧定生輩皆就逮繫獄桐城錢秉鐙宣城
沈壽民亡命得脫假令王師下江南少緩則
復社諸君子難乎免於白馬之禍矣 朱彝尊
靜志居詩話復社雖太倉二張主之實引次尾
扶九相助當其時烏程溫相君有子求入社扶

九堅持不可於是徐懷丹之檄陸文聲之疏
周之夔之彈事又繼以王實鼎之飛章而復社
禍機既發扶九亦日在憂患中

秋典湖廣試刑科給事中宋政為副與熊魚山開

元鄭淡石會先生書宋九青逸事九青以

刑右給事副余使楚兩人相得甚蓋其時天下
已多事楚日岌岌而武昌阻大江固無恙楚之
賢士大夫為魚山熊公淡石鄭公乃九青同年
生又皆吏於吾土聞兩人之至也拏舟來酌酒
江樓叙述往昔商校文史夜半耳熱談天下事

流涕縱橫先生宋玉叔詩文集序守官京師
從九青游奉使同事楚闈登黃鶴樓俛眺荆江
鄂渚間拊楹慷慨九青題咏甚夥余愧未能成
章亦勉賡以紀名勝九青不鄙而進余謂可深
造於斯事先生梅村詩話九青年十九登乙
丑進士任吏科給事陞太常進戶部侍郎以枚
卜遇譴歸嘗與余同使楚竟陵鄭淡石贈什曰
剖斗折衡為文章天下婁東與萊陽謂吾兩人
也張溥跋宋九青送熊魚山文手卷熊魚山
鄭淡石兩先生之為諫官也一以三月去一以

十月去顧其合吾吳則皆六年也蘇松財賦甲天下吳江華亭殷大尤冠二郡兩先生以德填之六年之內無逋賦無罷人百姓稱爲至平迺天子再命大吏稽錢穀時淡石行矣文書往來高下者久之獨兩先生調他職徵其說則曰以賦故也都人士目睽睽益不知所謂嗟乎苟不得所謂讀兩先生封事可矣苟不及讀兩先生封事讀宋九青一篇送行文其亦可矣

夜泊漢口

十年丁丑二十九歲

充東宮講讀官

陳

子龍

贈吳太史充東宮講官

詩蒼葭開震域青殿接文昌霞氣騰元圃瓊條拂畫堂選端周典禮拜傳漢元良史職移仙省宮僚總帝鄉金貞儲后重玉立侍臣莊羽籥傳秋實詩書出尙方夏侯經術茂皇甫素懷芳雞戟青槐蔭龍泉碧藻香珠簾參晚燕璧月照春坊卞賦情文稱王箴忠愛長一時推碩德萬國仰重光媿我羊裘側思君象輅旁臨風疏館靜遙夕可相望

劾張

至發

直聲動朝右

明史萬歷中申時行王

錫爵先後枋政大旨相紹述謂之傳衣鉢張至發代溫體仁一切守其所為而才智機變遜之嘗簡東宮講官擯黃道周為給事中馮元飈所刺至發兩疏詆道周而極頌美溫體仁孤執不欺為編修吳偉業所劾

七月次女生後適海寧陳直方 容永相國之遊子

先生遣悶詩一女血淚啼闌干舅姑嶺表無書傳一女家破歸間關良人在北愁戍邊更有一

女憂風煙圍城六月江風寒 按先生長女適王天植陳生增城令

瑞國子又有女適桐城何某贛州守應璜子又考婁東耆舊傳張垣娶梅村吳公第六女垣宿

遷訓導蒿園之子給諫王治之孫

又按先生行狀及墓表女九人郁淑人出四側室浦孺人出三側室朱安人出二致延陵家譜一通諸生王陳立增城令瑞國子一通海甯孝廉陳容永相國之遊子一通江甯監生何崇贛州守應璜子一通胡金門一字宜興諸生周申祺未嫁年郁淑人出一通吳縣錢鏡徵一通崑山監生李昶側室浦氏出一通監生張垣一通常熟國子監助教封翰林院庶吉士席永恂側室朱安人出

吳梅村先生年譜卷一終

吳梅村先生年譜卷一

吳梅村先生年譜卷二

十一年戊寅三十歲

江右楊機部廷麟以翰林改官兵部主事贊畫督

臣盧象昇軍事

與楊鳧岫士聰謀劾吏部尚書田惟嘉太僕寺卿

史堃諸不法事 先生左諭德濟寧楊公墓誌銘

丁卯會試同考得春秋士二十三人明年皇太

子出閣講學充校書官以職事糾中書黃應恩

失當事意尋以經筵講官召對面論考選得失

疏劾吏部尚書田惟嘉及其鄉人史堃所為諸

不法上用其語惟嘉黜免莖逮問未幾田史之
黨復振公病請回籍辛巳史莖死獄中詔籍其
家應恩前已他事論死乃思公言爲可用 又
公謹質凝重大節其以職事糾黃應恩也應
恩者小人歷事久關通中外舊制詞臣於殿閣
大學士爲同官而中書特從史卽積資至九卿
不得鈞禮淄川相以外臣入廢掌故而應恩挾
中官重示籠絡又助爲調旨以此得相張心益
驕無舊節公與語不合立具奏又移書淄川責
數之而僉人盡目懾公矣田惟嘉者以吏侍郎

取中旨進於相張爲師生而史莖特虎而鷲父
喪家居頤指諸大吏爲威福天下莫敢言公於
便殿白發其端退而上書條疏脏釁章十數上
三月二十四日召對進端本澄源之論

湯太淑人八十稱觴

李繼貞壽吳母湯太夫人

八十文昔吾婁有隱君子曰竹臺吳先生者邃
於學潔於行而嗇於遇以圖史茶香自娛環堵
蕭然有不屑一世之意余猶憶其與先大夫交
至皓首無嫚容無窈言每相對揚抃風雅旁及
世故必有規而無隨先大夫嘗目之曰此古狷

文下註載萍槎集四字
不錄文

士吾石友也當年與先生偕隱者則前有王孺
人與今湯太君並爲裘褐佳助而湯太君實舉
二玉長公異才不售仍隱邱樊次公執經於余
余之次男序受業於次公而次公廩學宮試輒
冠軍名噪海內而以其子太史駿公蚤貴封如
其官弗克自竟厥志歲當戊寅太君壽躋八十
形神王甚髮半白行不藉掖其爲期頤兆無疑
也時朝野名碩能文章者慮無不屬辭布幣觴
舞於堂而次公顧願得不佞之質言爲殿曰他
文之斐然燦然者大都頌他人之親之美耳取

他人親以頌吾親頌者不傷厚受者難矣不佞
則謂人之頌親而頌人親者其親無可頌也如
太君固他人親所借爲頌者庸患無辭嘗試畧
舉一二亦有能如太君之以生不逮事舅姑爲
嘽而隆禮備物寄意於其外王父母者乎亦有
能如太君之思念竹臺公歲時蒸嘗必手調手
薦聲淚俱下二十年如一日者乎亦有能如太
君之柔謙善下事王孺人惟謹疾則束身侍左
右進湯藥靡間昕夕者乎亦有能如太君之友
愛孤嫠不憶其前邾而但憫其後艱者乎亦有

能如太君之御諸奚娠慈嚴有體不罰而化卽
譙呼可當鞭箠者乎亦有能如太君之敦尙素
樸荆布操作自少至貴不改其度者乎亦有能
如太君之閭修淨業齋心持頌而不接巫尼之
面不履招提之境者乎是數者吾卽不謂人親
不一能而不敢謂人親必具能也至如次公盛
年屢躡場屋方淒其愁絕慮無以對母而太君
夷然自若撫慰之有加比太史公弱冠魁天下
官玉堂侍講幄賓友青宮褻蹄文綺大官捫酒
之賜時時馳以壽大母而太君亦夷然自若惟

寄語竭忠抗節以不負明天子異數耳是二者
無論今人親難能卽求諸古人而自唐崔元暉
宋尹焯母外未數數見也世乃豔稱截髮延賓
封鯨遠嫌之母津津於子之名譽得失起見者
何居嘻乃知太史公集福之自矣在易晉之二
不云乎受茲介福於其王母夫王母固福原也
康侯之蕃錫殷接俱受諸此而詢母所爲自求
多福者不過曰失得勿恤云耳然則無欲之所
以語王佐而不誠之所以稱上治詎非此勿恤
之一念階之哉乃王母以坤索而稱中女則世

真有不須眉而識量過男子者也非太君其孰能當此義乎由此義也使長公不知有其布素卽樂與次公何異使次公不知有其子貴卽貴與身自致之者何異使太史公不知有其大科名世之烜赫鸞坡鰲禁之清切襜袍撤炬之優崇卽他日事業與臯夔伊傅何異而何一非太君之識量爲之鍾祥貽穀也耶今夫春葩秋葉非不鮮妍也微雨浥之而欣欣微霜集之而索索此何足語寒暑之變哉松翠參天甘露降其上不加榮積雪封其顛不加瘁而後其下乃有

靈菟乃有江珠出爲天下寶貴矣余請以是爲太君壽而次公得毋笑余之不斐不燻乃爾乎則請陳太君前曰見吾家三世交習見吾先子有規無隨之風範而爲是言者也太君其啞然而舉一觴乎

十二年己卯三十一歲

升南京國子監司業

李

繼貞

與門人吳禹玉書

令長公南司成之推大爲扼腕要之饒山水多高賢宜詩酒有此三快三公不易矣今已抵任否門下奉親之暇何以爲適園林窮勝事鐘鼓

樂清時此二語可以當之

督師盧

象昇

死

先生詩話盧自謂必死顧參軍

書生徒共死無益乃以計檄之去機部不知也
機部到孫侍郎傳廷軍前六日盧公於賈莊死
難矣 明史盧象昇傳楊廷麟上疏嗣昌怒奪
象昇尚書巡撫張其平閉闔絕餉俄又以雲晉
警趣出關王朴徑引兵去象昇提殘卒次宿南
宮野外畿南三郡父老聞之咸叩軍門泣請移
軍廣順無隻臂之援立而就死象昇流涕謝以
事從中制食盡力窮旦夕死矣無徒累爾父老

爲衆號泣各攜斗酒粟餉軍十二月十一日進
師至鉅鹿賈莊起潛擁關寧兵在雞澤距賈莊
五十里而近象昇遣廷麟往乞援不應師至蒿
水橋遇 大清兵象昇將中軍大威帥左國

柱帥右遂戰夜半鬻築聲四起旦日騎數萬環
之三匝象昇麾兵疾戰呼聲動天自辰至未礮
盡矢窮奮身鬪殺後騎皆進手擊殺數十人身
中四矢三刃遂仆掌牧楊陸凱懼衆之殘其屍
而伏其上背負二十四矢以死一軍盡覆大威
國柱潰圍得脫 明史楊廷麟傳十一年冬京

師戒嚴廷麟上疏劾兵部尚書楊嗣昌言大臣以國爲戲嗣昌與高起潛方一藻倡和款議武備頓忘督臣盧象昇以梟國責樞臣言之痛心夫南仲在內李綱無功潛善秉成宗澤隕命乞陛下赫然一怒明正向者主和之罪俾將士畏法無有二心嗣昌大恚詭薦廷麟知兵改兵部職方司主事贊畫象昇軍

思義攷

虞山蒙叟詩

孤臂云何堪兩胸只墮西事不成東又不能曲突到焦頭五月邊書九月售薊督方一藻督監高起潛本兵楊嗣昌共謀輸平以緩國難五月

通事人周元忠致信云款若不成夏秋必有舉動十一年九月

大清兵入牆子嶺殺總督

吳阿衡毀正關至營城石匣駐於牛蘭召宣大山西三總兵楊國柱王朴虎大威入衛三賜象昇尚方劍督天下兵楊嗣昌高起潛主和議象昇聞之頓足嘆帝召問方畧象昇對曰臣主戰帝色變良久曰撫乃外廷議耳其出與嗣昌起潛議議不合事多爲嗣昌起潛撓疏請分兵則議宣大山西三帥屬象昇關寧諸路屬起潛象昇名督天下兵實不及二萬

本本全詩片
梅村年譜卷二

漳浦黃公道周論楊嗣昌奪情事受廷杖先生遣

太學生涂仲吉入都訟寃于上怒嚴旨責問主使

先生幾不免奉使封延津孟津兩王於禹州

過汴梁登梁孝王臺漳浦黃公南還先生與馮

司馬遇之唐樓舟中出所註易授先生

思義攷楊奪情為大司馬已大拜至戊寅冬寇變

衆懼不免而聖眷彌篤已而暫削官階冠帶辦

事隨卽賜復九月督師盪寇錫宴後殿賜御製

詩以寵其行詩曰鹽梅今借作干城大將威嚴

細柳營一掃寇氛從此靖還來教養遂民生李

少司馬雜錄云看此詩氣象蕩平有機若使功

成報命便與裴晉公何異惜乎虛此盛典也虞

山蒙叟投筆集注云閣臣楊嗣昌素奉佛法既

出視師專意招降賊降者數十萬卽於附近安

插未幾降者復反四面皆起王師如在重圍中

矣嗣昌每日持誦華嚴謂此經可以消劫

十三年庚辰三十二歲

升中允諭德

嗣父文玉公卒陳廷敬先生墓表升中允諭德

丁嗣父艱服除會南中立君登朝一月歸

本本全言月
本本全言月
本本全言月
本本全言月

臨江參軍 先生詩話機部自盧公死後其策

益不用無聊生詔詰督師死狀賈莊前數日

督師誓必戰顧孤軍無援聞太監高起潛

史 陳起 兵在近則大喜於真定野廟中倚土銜

作書約之合軍高竟拔營夜遯督師用無援

故敗機部受詔直以實對慈谿馮鄴仙得其

書謂余曰此疏入機部死矣為定數語機部

聞之則大恨先是嗣昌遣部役張姓者

史云 龍 偵賈莊而其人譚盧公死狀流涕動色嗣

昌榜笞之楚毒備至口無改辭曰死則死耳

盧督師忠臣吾儕小人敢欺天平遂以拷死

於是機部貽書馮與余曰高監一段竟為刪

却後世謂伯祥不及一部役耶然機部竟以

此得免已而過宜興訪盧公子孫再放舟婁

中與天如師及余會飲十日嘉定程孟陽為

畫髯參軍圖余得臨江參軍一章余與機部

相知最深於其為參軍周旋最久故於詩最

真論其事最當即謂之詩史可勿愧機部後

守贛州從城上投濠死

機部隆武朝進兵部 府南贛丙戌十
月初四日死難

十四年辛巳三十三歲

李自成 陷河南福王 常洵 遇害有汴梁二首

五月哭張西銘師

再許復社命下南郭獨條對上獄乃解 張 采 具

陳復社本末疏臣係崇禎元年進士選授江西撫州府臨川縣知縣在官兩載以勞成疾告病歸家十餘年殘廢在牀不能窺戶外今十月中忽聞邸報有原任刑部侍郎一本再陳神通廣大合謀構陷事奉聖旨云云欽此伏念某與臣姓名未通何故向息影之人彎弓虛發及見某

疏下註載金鴻縣志五字
不錄疏
按采有文集

原疏並無一字及臣則某固不知世間有臣矣合謀構陷臣無可辯惟復社一案責張溥及臣回奏惜溥已死臣謹齋沐陳之我朝制科取士因重時文凡選鄉會中式文日程墨選進士文曰房書選舉人文曰行卷其諸生徵文彙選曰社藁從來已久若復社之起臣已爲縣令不預書生事張溥時猶未第故選社文以臣向同研席代臣作序及溥成進士而臣已病廢矣豈意臣里中姦人私隙中傷有復社一款下蘇松提學前學臣倪元珙曾經具覆奉旨再察既學臣

元璋以丁憂去張鳳翽以外轉去懸案未結事
會致然罪不在臣與溥也乃夏五月初八日溥
病身死惟臣僅生謂復社是臣事則出處年月
不符謂復社非臣事則溥實臣至交生同砥礪
死避羅弋負義獨全臣不出此竊惟文者昭代
之所重社者古義所不廢推廣溥志不過欲楷
模文體羽翼經傳耳未嘗有一毫出位躍冶之
思也至於或問及罪檄此忌溥者羅織虛無假
名巧詆不惟臣生者不聞亦溥死者不知若使
徐懷丹果有其人臣願剖心與質倘其人烏有

則事必誣構獨念溥日夜解經論史矢心報稱
曾未一日服官懷忠入地卽今嚴綸之下并不
得泣血自明良足哀悼臣雖與世隔越孤立杜
門而兢兢勉學頗列省察不欲一字自欺豈敢
一字欺皇上謹據實回奏臣無任戰兢待罪之
至 靜志居詩話崇禎戊寅南國諸生顧杲等
百四十人具防亂公揭請逐閹黨阮大鍼子方
實居其首有云杲等讀聖人之書明討賊之義
事出公論言與憤俱但知爲國除姦不惜以身
賈禍大鍼飲恨刺骨而東林復社之讎在必報

矣大鉞名在東林點將錄號沒遮攔而閩人周之夔亦注名復社第一集阮露刃以殺東林周反戈以攻復社君子擇交不可不慎於始也

陳鼎東林列傳蠅蚋錄出於溫體仁蝗蝻錄出於阮大鉞又有續蠅蚋錄及蝗蝻錄乃復社諸君子也計二千二百五十五人惟兩陝滇中無人

十五年壬午三十四歲

春

大清兵克松山洪

承疇

降遂下錦州祖

大

壽以錦州降有松山哀

七月田貴妃薨葬天壽山有永和宮詞

十六年癸未三十五歲

升庶子

李自成

破潼關督師孫

傳延

戰死有雁門尚書行

文祖堯

來為太倉州學正鼎革後棄官寓僧寺以

青烏術自給人皆知滇南先生有文先生六十壽

序送文學博以蒼公招同任中峯寺曇陽觀訪文

學博介石兼讀蒼雪齋遺跡有感諸詩

志衍之成都任有送志衍入蜀詩

附先生詩話卞玉京題扇送余兄志衍入蜀云

剪燭巴山別思遙送君蘭楫渡江臯願將一幅
瀟湘種寄與春風問薛濤

秋七月

由崧襲封福王

十二月文選司郎中吳

昌時

棄市

吳江縣志吳

昌時少受業於周忠毅宗建故與清流通聲氣
而爲人墨而狡旣通籍日奔走權要探刺機密
以炫鬻市重周延儒之再起也昌時爲通關節
及爲首輔其辛未取士馬世奇本延儒師力勸
以正故初治事頗有賢聲而昌時則挾勢弄權
大啟倖門延儒視師通州一晨而昌時之啟事

入至帝密刺之知其交關狀而未發吏部舉行
年例先擇選事故事副郎有調部者正郎不調
部昌時欲持權使人誑冢宰鄭三俊曰昌時持
正有風力主年例爲宜遂從儀制正郎調文選
事爲破格人皆側目及舉行年例出異已者十
人於外一時大譁旣而御史蔣拱宸劾昌時贓
私巨萬多連延儒并言內通中官漏洩禁密事
帝震怒御中左門親鞫之遂下獄論死且始有
誅延儒意時魏藻德新入閣有寵謂其師薛國
觀之死昌時實致之恨昌時甚因與陳濟甚排

延儒掌錦衣衛者駱養性復騰蜚語帝遂命盡
削延儒職勒其自盡而昌時棄市論者謂二人
無逃刑帝能申法也

維陽行 先生詩話陳臥子嘗與余宿京邸謂
余曰卿詩絕似李頎又誦余維陽行一篇謂
爲合作

大清順治元年甲申

明崇禎三十七年三十六歲

三月流寇陷京師莊烈帝崩於萬壽山先生里居
聞信號痛欲自縊爲家人所覺朱太淑人抱持泣
曰兒死其如老人何乃已 明史周遇吉傳十七

年二月太原陷遂陷忻州圍代州遇吉先在代
邊其北犯乃憑城固守而潛出兵奮擊連數日
殺賊無算會食盡援絕退保寧武賊亦踵至遇
吉四面發大礮殺賊萬人設伏城內出弱卒誘
賊入城殺數千人城圯復完者再傷其四驍將
自成懼欲退其將曰我衆百倍於彼但用十攻
一更番進蔑不勝矣城遂陷闔家盡死而大同
總兵姜瓖表至自成大喜方宴其使者宣府總
兵王承廕表亦至自成益喜遂決策長驅歷大
同宣府抵居庸太監杜之秩總兵唐通復開門

附唐孫華東江集談金陵舊事詩金陵昔喪亂炎運值標李忽從大梁城倉皇走一騎偶竊藩邸璋自言某王嗣貴陽一奸人乘時思射利奇貨此可居何暇論真偽卜者本王郎矯誣據神器遂收代來功超踰登相位權門輦金帛掖庭陳秘戲江左張黃旗王氣銷赤幟偷息僅一年傳聞有二異北來黃犢車天表有英粹雜問聚朝官瞠目各相視遂識謀臣向滿言官壺事諸巨媚新君誰肯辨儲貳爭效雋不疑競指成方遠泉鳩無主人束縛乃就吏復有故宮妃飛蓬亂離髮自言喪亂時此離中道棄生子已勝衣壯髮猶可識不望昭陽恩不望金屋恥願一見大

延之京師遂不守矣賊每語人曰他鎮復有周總兵吾安得至此楊士聰甲申核真畧賊之陷二關而入也守寧武關者總兵周遇吉夫婦臨陣殲賊無數賊誘降不從力盡全家赴火賊屠其城嘆曰使守將盡如周將軍吾何以得至此是日至宣府白廣恩官撫民與總兵姜瓖約降至居庸太監杜之秩與唐通俱降先生綏寇紀畧自成初盜福邸之貲以號召宛維逮乎京師陷其下爭走金帛財物之府以分之彼飢寒乞活之人一旦見宮室帷帳珍怪重寶以千數志滿意得飲酒高會肱篋擔囊惟恐在後

山海關總兵吳二柱奉詔入援聞燕京陷猶豫不進自成執其父襄合作書招之許以通侯之貴三桂欲降至灤州聞愛妾陳沅為賊所掠大憤急歸山海關乞降於我詩中有衝冠一怒為紅顏句三柱賫重幣求去此詩先生弗許

四月鳳陽總督馬士英等迎福王由崧入南京稱監國王寅自立於南京國號宏光

分江北為四鎮以黃得功劉澤清劉良佐高傑領之

家眼目廿八地上書欲自通沈
九閣閣詔什掖庭獄見者垂垂
淚不知屬王母銜憤早自刺祇
緣當壁假翻招故劍忌誠恐相
見非此跡跡秘滅口計未忍對
面諒餘愧鳥獸有沈沈豺虎知
乳孽豈獨非人情捐棄恩與義
痛呂及牛馬秦晉改置皆位昭
孕中長養崇非類未聞妾男子
潛盜出不意記種乞為奴祇假
得暫恣茲賢眾口傳曾見遺老
記疑事終闕如庶聽來者議
錄之以廣異聞

史可法 開府揚州 按東華錄有攝政王遣南來副將韓拱薇等致明大學士史可法書宏光甲申九月十五日
日史可法答攝政王書
五月

大清定鼎燕京

十月張獻忠破成都志衍一門三十六口俱被害

有志行傳觀蜀鵑啼劇題志衍山水詩

附尤侗蜀鵑啼詩跋易水和歌壯士為之慷慨

山陽吹笛故交所以歔歔况乎國破家亡一門
鬼籙生離死別萬里人琴楚些有甚於招魂虞
挽倍纏於思舊在昔延陵公子官落珠江江成都

府君身縻玉壘遭黃巾之搶攘致墨綬之流離
丹青杜宇之祠碧化萋宏之墓滄桑既隔汗簡
無傳爰有邱生聞之累息問弱弟之奔喪傷心
唳雁弔孤臣而流涕染血啼鵑披遺事於西川
譜新聲於南部梅村先生每懷禾黍之悲兼抱
鶴鴒之痛危乎蜀道風煙重話瞿塘愴矣梨園
簫鼓如聞天寶陸士衡之哀永逝腸斷三生桓
子野之喚奈何情深一往白頭反袂青管題襟
僕本恨人感茲樂句讀曲而嘆令人對此茫茫
賦詩以興正自不能已已

姜 塚 謫戍宣州衛有東萊行 明史姜塚傳塚杖

已死弟塚口溺灌之乃蘇盡力營護後聞鄉邑

破父殉難一門死者二十餘人塚請代兄繫獄

釋塚歸葬不許即日奔喪奉母南走蘇州 又

塚為行人見署中題名碑崔呈秀阮大鍼與魏

大中並列立拜疏請去二人各及大鍼得志滋

欲殺塚甚塚變姓名逃之寧波國亡乃解

先生有姜

如須從越中 王 士 正 感舊集小傳崇禎壬午

寄詩次韻 塚擢禮科給事中五月中條上三十疏以言事

觸首輔怒與行人司副熊開元同下北鎮撫司

獄備極考掠幾死者數矣甲申正月謫戍宣州

衛聞京師陷思陵狗社稷痛哭而南之戍所未

至以金陵赦畱吳門不肯歸以馬阮用事避地

徽州祝髮黃山自號敬亭山人戊子奉母歸萊

陽山東巡撫重其名遣使招之先生故墜馬以

折股給使者而夜馳還江南自號宣州老兵欲

結廬敬亭未果病亟遺命葬宣城戍所口吟易

簣歌一章以卒 盛 敬 成仁譜崇禎癸未 大

兵入關山東雲擾萊陽諸生姜瀉里字爾岷偕

其季子坡及工部侍郎宋玖玖宗人吏部稽勳

司郎中應亨俱以罷任家居經畫守禦兵薄城
下坡發一砲中其帥首少却亡何夜襲城兩家
皆驅家僮巷戰刃中瀉里背見殺坡抱父屍大
罵兵鬻之執政應亨相對拷掠不屈死按瀉里
塚父
左懋第充通問使有下相極樂庵讀同年北使時
詩卷 明史左懋第傳懋第初授韓城知縣有異
政考選戶科給事中福王立爲應天巡撫甲申
大學士高宏圖議遣使通好於我而難其人懋
第請行八月渡淮十月朔次張家灣止許百人
入都懋第縷服以往館於鴻臚寺以不得赴梓

宮卽於館所遙祭是月二十八日遣還尋自滄

洲追還改館太醫院

葛芝

臥龍山人集侍郎

奉使在北羈太醫院也部曲有盜餉潛通者侍
郎怒杖殺之其黨因告侍郎有異圖攝政王陳
兵入院令曰薙頭者生不薙者死侍郎叱曰頭
可去髮不可去同行數十人不屈者參贊兵部
陳用極游擊王一斌都司張良佐王廷佐劉統
五人而已因趣下刑部銀鐺數重七日不動遂
執以如王所王愈欲降之則令侍郎之兄道意
不得因請死王猶豫未決侍郎奮曰男兒死耳

何疑爲拽出順城門將就縛飛騎至曰降者王
矣侍郎曰寧爲上國鬼不願爾封王也六人以
次受戮用極與侍郎屍直立不仆忽驚風四起
斷蓬飛入天際觀者爲之流涕罷市

二年乙酉三十七歲

南京召拜少詹事

二月

王師南下揚州史

可法

嬰城固守攻益

急

可法

十餘疏告急宏光以演劇不省援兵不至

刺血作書別其母妻

王師以飛礮擊城西南

隅陷

可法

死之有揚州詩

五月初九日

王師渡江福王

由崧

奔太平南

都亡

褚人獲

堅觚集乙酉五月王師下江南吾

蘇帖然順從六月十三日忽有湖賊揭竿殺安

撫黃家窰城中鼎沸賴大兵繼至得寧

劉

澤清

降我

朝惡其反覆磔誅之有臨淮老

妓行

王

士正

南征紀畧淮安頗稱鞏固甲申五

月澤清實來盤踞與田仰日肆歡飲大兵南

下有問其如何禦者曰吾擁立福王以來供我

休息八月大興土木造室宇極其壯麗僭擬王

居休息淮上

觚賸澤清建闔淮陰興屯置權

富亞鄒塢而漁色不已天旅南下托以左兵犯
順率旅勤王撤戍離汎大掠南行遇王師於蕪
湖謀入海不得倉猝迎降

鄭芝龍

黃道周

等奉唐王

聿鍵

稱監國六月自立

於福州號隆武

楊文驄

之聞有送友人從軍閩

中讀友人舊題走馬詩於郵壁漫次其韻 成仁

譜楊文驄字龍友貴州貴陽縣人崇禎辛未進
士以職方郎中監鎮江軍乙酉夏鎮江潰六月
安撫黃家竊至蘇州文驄結陳情等攻殺之尋
入浙至閩拜兵部侍郎丙戌福州陷率川兵搏

戰不克死

九月執

由崧

以歸於京師

先生應南京詹事之召甫兩月

奕琛

夤緣馬士英

復柄用修舊卻先逮吳御史

迺

次擬先生先生知

事不可為又與馬阮不合乃謝歸 明史奸臣傳

朝政濁亂賄賂公行四方警報狎至士英身掌
中樞一無籌畫日以鋤正人引究黨為務時有
狂生大悲出語不類為總督京營戎政趙之龍
所捕大鉞欲假以誅東林及素不合者因造十
八羅漢五十三參之日書史可法高宏圖姜曰

廣等姓名內大悲袖中海內人望無不備列獄
詞詭秘朝士皆自危而士英不欲與大獄乃止
夏允彝 幸存錄馬士英入政府方快於逐姜
劉而用阮大鍼不復顧大柄之委去也大鍼一
出凡海內人望無不羅織巧詆貪夫壬人無不
湔洗拔用 先生冒辟疆五十壽序往者天下
多故江左尙晏然一時高門子弟才地自許者
相遇於南中刻壇墀立名氏陽羨陳定生歸德
侯朝宗與辟疆為三人皆貴公子 又有晚人
者流寓南中故奄黨也通賓客畜聲伎欲以氣

力傾東南申酉之亂彼以攀附驟枋用與大獄
以修舊郅定生為所得幾填牢戶朝宗遁之故
鄣山中南中人多為辟疆耳目者跳而免尋以
大亂奉其父憲副嵩少公歸隱如臯之水繪圍
誓志不出 先生吳母徐太夫人壽序當幼洪
為給諫余亦官南中以母老歸養請急東還聞
幼洪之及也余自知不免雖然不敢以告吾母
也無何江南大亂余奉母奔竄山中幼洪亦自
獄所脫歸母子相見倉皇避兵皆懂而後免今
太夫人康疆壽考諸子拜堂下進七十之觴而

吾母亦健飯無恙兩家母子同以危苦得全此
非天爲之耶

五月十七日州役皂隸輿廝等毆張受先以積米
未明爲詞劉河兵以數月乏糧擁至城勢張甚十
九日滿城民夜皆聞鬼哭二十日士民訛言

大兵已至蘇州居民驚徙城市一空知州朱

喬秀

咨而懦卒當時危惟擁貨闔門爲走計六月初二
日盜庫帑逸初四日州亂焚搶蜂起先生避亂礬

清湖有礬清湖讀史雜感避亂詩

思義

朱昭芭

明鑄

小山雜著乙酉閏六月一日夜將半訛言

忽起傳有寇警余披衣起露立庭中見天上小
星散落如雪洪範曰庶民惟星其隕如星乎十
六日望夜月食之旣衆星流移縱橫絡繹各有
芒角占曰百姓流徙之象吳人輕名節而重毫
髮始則望風納款繼乃愛惜顛毛遂各稱兵旅
拒崑山咫尺音問不通鄉城唇齒辨髮相戮枯
守城中正如坐井七月初四日屠嘉定初六日
屠崑山十二日屠常熟吳郡縣七州一崇明懸
處海外六邑五受傷夷惟一州爲魯靈光之獨
存自雜弁恣意淫刑悍卒踴躍奪劫鄉城哽咽

互召敵仇譬之蟹然去其郭索之物惟餘頑然
一腹究復何濟七月初四日屠嘉定左通政侯
峒曾死之子元黃元潔從死觀政進士黃淳耀
自縊於真濟寺弟金元從死孝廉張介子縊於
文廟學正龔用圓投井死初六日屠崑山原任
總兵王南陽貢生朱集璜死之孝廉徐開元妻
自縊長子次子不忍其母痛哭罵軍大怒縛置
庭柱亂鏃射殺二子善屬文有美才崑山被屠
者幾及八萬人俘婦女無算其軍士大約黃靖
南降卒也淫殺十倍北軍十二日屠常熟是日

前荆兵以義陽王爲名需索大戶士女逃竄城
郭爲空以故軍至無大獲所屠者單戶而已三
縣合計所屠之戶不下二十萬人凡厚貲強有
力者先遷荒野遇害間有一二大率中人下戶
居多語云千金之子不死於市信哉八月初三
日李成棟統軍屠太倉各鎮李成棟移師至松
江府松江水師敗北提督京口水營總兵王蜚
吳淞總兵吳志葵被擒王蜚死之破府城屠四
五萬人俘婦女畧同吳郡吏部考功司主事夏
允彝沉河死守金山衛指揮侯懷玉死之

六月

大兵入浙有堇山兒詩

楊陸榮三藩

紀事本末乙酉官兵既入浙縱肆淫畧總鎮聞
梟示十數人合搜各船所掠婦女給還本夫兵
士畏法遂以所掠沈之江中 又乙酉六月我
貝勒留兵二千駐吳閫大軍悉趨杭州掠嘉興
而過時潞王常洵在杭撫按請命奉書迎降而
嘉興士紳屠象美等復集兵據城守大兵還攻
半月而破

閏六月祖母湯太淑人卒

三年丙戌三十八歲

瞿式耜

等以桂王

由榔

監國於肇慶號永歷

事衍自蜀中徒跣逃歸有哭志衍詩

秋王煙客

時敏

治西田於歸涇之上去城西十有

二里是為十四都構農慶堂稻香菴霞外閣錦鏡
亭西廬語稼軒逢渠處巢安等室約張南垣疊山
種樹錢虞山作記先生為作歸村躬耕記

琵琶行

西田詩

和王太常西田襍興

福建道監察御史贈太僕寺卿謚忠毅李公神
道碑銘

四年丁亥三十九歲

本本全言片
本本全言片
本本全言片

正月 大兵克肇慶桂王奔桂林尋奔全州以

式耜 畱守桂林

元配郁淑人卒

楊繼生任太倉學正有閩州行贈楊學博爾緒

顧昺齋 王夏雜抄楊先生秉鐸吾婁妻女

在蜀遭亂已無可奈何矣會吾婁盛泰昭釋褐

秦之畧陽合楊以杯酒餞之日倘至彼中得吾

家消息片鴻寸鯉勿靳也盛赴任一載偶以事

出見婦人負血書匍匐道左物色之即楊內閩

也乃假以一椽飛書廣文婦嚙二指以血作字

并斷指裹來楊得之慟卽以二百金授使俾儼

舟東下會南宮期近楊束裝且北至京口有北

舟歛南偶觸詢之則楊夫人舟自陝來也相別

十餘年流落萬死天作之合異哉方出門時女

猶襁褓今已覓壻同來如一家

游越有謁范少伯祠登數峯閣禮浙中死事六君

子鴛湖曲鴛湖感舊

王煙客招往西田賞菊有詩

梅村年譜卷二

吳梅村先生年譜卷二終

吳梅村先生年譜卷二

五年戊子四十歲

七月同年楊鳧岫卒先是京師陷鳧岫投愛女於井趣妻妾縊死已則仰藥自殺為防守者所覺水灌之大吐復活夫人孔氏懸絕甦乃棄家避兵武塘復徙丹陽金沙終歸毘陵鬱鬱不得志以死有左諭德濟寧楊公墓誌銘

八月築舊學庵於梅村西偏先生自為記

按先生所居梅村舊為王士驥賁園稱莘莊在太

倉衛東中有樂志堂梅花庵交蘆菴嬌雪樓鹿樵

溪舍橙亭蒼溪亭諸勝

思義攷先方伯松霞公日記甲申正月晤張南垣於

吳駿公之居梅村當是申酉間所購

後東臯草堂歌

先生詩話稼軒由進士爲兵

科給事中好直諫爲權相所訐罷歸築室於

虞山之下曰東臯極游觀之勝酷嗜石田翁

畫購得數百卷爲耕石齋藏之未幾里中兒

飛文誣染逮就獄余時在京師所謂東臯草

堂歌者贈稼軒於請室也後數年余再至東

臯稼軒倡義粵西其子伯升門戶是懼故山

別墅皆荒無斥賣無復向者之觀余爲作後

東臯草堂歌蓋傷之也又二年知以相國畱

守桂林城陷不屈與張別山俱死

六年己丑四十一歲

夏願雲師從靈隱來止城西太平菴別先生將遠

游廬嶽且期以出世先生作詩贈之 婁東耆舊

傳王瀚字原達受業於張采爲諸生有名國變

爲僧號晦山大師名戒顯字願雲庚寅夏入廬

山遂至席江右瀚雖入空門悲憤激烈曾檄討

從賊諸臣云春夜宴梨園不思銀碧池頭之泣

端陽觀競渡誰弔汨羅江上之魂讀者俱爲扼

腕 焚餘補筆原達性好佛崇禎甲申之變作
詩謝文廟云忝列諸生踐極年義應君父死生
連薄言草莽無官責敢卸衣冠哭聖前讀罷捲
堂羞國士身同左袒幸敷天孤踪願謝宮牆籓
甘作山農種石田素心多載想盧能獨係高堂
久未曾國事一朝論鼎沸浮名何惜付層冰聊
將毀服存吾義從此棲禪學老僧拭取青山無
累眼好清世事理禪燈遂入山爲僧名戒顯乙
酉六月州宦陸遜之自淮歸云淮陽自有德宗
上人知未來事陸以太倉問之德宗以州有再

來人王和尚底過再不犯兵革蓋指瀚也州竟

不被慘禍云

按先生後有得廬山願雲師
書喜願雲師從廬山歸諸詩

黃陶菴文集序 興福寺鐵爐銘 鴻臚寺序

班封兵部武選司主事丹陽荆公墓誌銘

七年庚寅四十二歲

十一月

大兵入桂林桂王奔臨桂伯瞿

式報

總督張

同做

俱死 先生詩話稼軒臨難遺表曰

庚寅十一月初五日聞警開國公趙印選移營
先去衛國公胡一青寧遠伯王永祚綏寧伯蒲
纓武陵侯楊國棟寧武伯馬養麟盡室而行惟

督臣張同儻從江東泗水過江相期共死其赴
義則閏十一月之十七日也纍囚一月兩人從
容唱和稼軒得詩八首曰二祖江山人盡擲四
年精血我偏傷又曰願作須臾階下鬼何妨慷
慨殿中狂其末章曰年逾六十復奚求多難頻
經渾不愁劫運千年彈指到綱常萬古一身留
欲堅道力憑魔力何事俘囚學楚囚了却人間
生死業黃冠莫擬故鄉游別山和章有曰稜稜
瘦骨不成眠祖德君恩四十年腰膝尙存堪作
鬼死生有數肯呼天又曰白刃臨頭惟一笑青

天在上任人狂又曰亡家骨肉皆冤鬼多難師
生共哭聲又曰此地骨原堪朽腐他時魂不待
招尋二公死有舊給事中後出家號性因者收
其骨義士楊碩父藏其稿稼軒孫文昌間關歸
以其詩與表刻之吳中爲浩氣吟云別山死事
最烈其未死也受拷掠兩臂俱折目睛出語不
爲撓稼軒有初六日紀事一詩曰文山當日猶
長揖堪笑狂生禮太疎別山和曰臂先頭斷生
堪賤身爲城亡計豈踈銜木焉知舌在否傷睛
因笑眼多餘此其被刑時事也稼軒以義命自

處從容整暇自警詩曰死豈求各地吾當立命
觀又自艾詩曰七尺不隨城共殉羞顏何以見
中湘蓋指何公騰蛟以殉難封中湘王也若兩
公者真可謂殺身成仁者矣

附陳瑚

輓詞序甲午春明畱守大學士稼軒瞿

公之喪至自桂林藩臬大吏合丞以下莫不奔
走而拜之國中縉紳先生耆老子弟暨其門生
故舊之屬皆束芻絮酒會哭於丙舍之旁蓋自
國變以來士大夫之仗節死難成仁取義其感
人未有若此之盛者也當公之在桂也中原鼎

沸閩浙瓦解公以書生未諳軍旅首倡大義定
策端州此豈復有成敗利鈍動其心哉及乎皇
天降禍大厦將傾內則馬吳諸臣外則趙陳諸
勳鎮曉夜謹嗽以亡桂爲事而公以一老臣拮
据其中左枝右梧首張尾決至於嚴關不守溶
江四潰逆知勢不可爲遂乃危坐衙齋幅巾待
盡酌杯酒以呼天却牽馬而弗御卒與少司馬
從容賦詩同日并命嗚呼何其壯也繇今觀之
一君死復立一君則世傑之忠也畱守重地以
一人當敵則宗澤之志也絕命之辭纍纍數千

言則文山之歌也牙將家人慷慨殉難則江萬里之義也死者人之所必不免而公之死則真可謂重於泰山者已僧虔顧子爲余言公生平有至性太公病卜於關壯繆之廟得前三三後三三之詞太公果卒於九月之九日後公謁選都門太夫人病卜於神兆如初時將給事黃門矣棄不受戴星南返以得侍湯藥爲快張西銘太史之過虞山也泊舟東臯之畔聞有孺子哭者哀聲達左右則公以至日祭其先人蓋每祭必然者也太史爲之感嘆不已古人有言忠臣

出於孝子之門豈不信哉

赴十郡大社

毛

奇齡

駱明府墓志駱姓諱復旦

字叔夜山陰人嘗同會稽姜承烈徐允定蕭山毛牲赴十郡大社連舟數百艘集於嘉興南湖太倉吳偉業長洲宋德宜實穎吳縣沈世英彭瀧尤侗華亭徐致遠吳江計東宜興黃永鄒祇謨無錫顧宸崑山徐乾學嘉興朱茂暉彝尊嘉善曹爾堪德清章金牧金范杭州陸圻越三日乃定交去

八月大風海溢有詩

得龔芝麓鼎孳書 先生詩話庚寅秋於臨清舟

中報余書曰庾樓之別垂十五年壬午以前猶
得時通音驛運移癸甲大棟漸傾妄以狂愚奮
身刀俎甫離獄戶頓見滄桑續命蛟宮偷顏眇
息墮坑落塹爲世慚人先生方霞引碧山之顛
鴻舉青雲之外西薇東菊萬仞難躋自顧生平
曾邀訪飾相期何等差跌如今所以伏處蓬蒿
欲有陳而未敢也停舫金閭幸龍門在望展晤
有期而先生既抱騎省之傷余亦迫王猷之棹
何圖咫尺復成參商惟從同人處見先生尺幅

寸幘片言隻字寶若明珠大貝火齊木難攬持
芳華以當瞻侍客秋至白門拜發良書欣聞警
欵歷然頑懦復起爲人感念疇曩泫然兩泣自
傷失路尙爲知己所收憐使同齒於舊游之未
中間情文溫緝慰諭綢繆金錯玉盤美人之遺
我厚矣伏蒙不棄鄙陋垂問雕蟲先生畱思文
章超絕前軌馬班屈宋蔚有兼長燭火至微何
敢妄希扶桑之耀且身旣敗矣焉用文之顧萬
事瓦裂空言一線猶冀後世原心宣鬱遣愁亦
惟斯道往在燕邸與秋岳舒章諸子各有抒寫

篇軸遂繁近年以來篷轉江湖仲宣登臨襟情
難忍嗣宗懷抱歌哭無端未極斐然不無驅染
然前則魂魄可召瑟旣苦而難調繼則離索寡
羣刀雖操而未善亟思大雅提振小巫九合葵
邱舍公誰屬方當悉索敝賦奉鞭弭於中原不
敢煩包茅之討也此行粗了殘局卽歸臥松筠
興會適來扁舟相就極論千古殫精百氏備孔
門之游夏稱鄴下之應徐庶幾餘生不同草木
先生著作雷霆天壤氣象名山其亦肯示雌霓
於玉筠授論衡於中郎否耶

至海虞有琴河感遇聽女道士卞玉京彈琴歌宴
孫孝若山樓賦贈諸詩

先生詩話卞玉京字雲裝白門人善畫蘭能書
好作小詩余詩云緣知薄倖逢應恨恰便多情
喚却羞此當日情景實語也又過三月爲辛卯
初春乃得扁舟見訪共載橫塘始將前四詩書
以贈之

附 虞山蒙叟讀梅村豔體詩有感書後四首并
序余觀楊孟載論李義山無題以爲音韻清婉
雖極濃麗皆托於臣不忘君之意因以深悟風

人之旨若韓致光遭唐末造流離閩越縱浪香
奩蓋亦起興比物申寫託寄非猶夫小夫浪子
沈湎流連之云也頃讀梅村豔體詩見其聲律
妍秀風懷愴惻於歌禾賦麥之時爲題柳看桃
之作旁皇吟賞竊有義山致光之遺憾焉兩窗
無聊援筆屬和秋葦寒蟬吟歎啾嘶豈堪與聞
關上下之音希風說響乎河上之歌聽者將同
病相矜抑或爲同牀各寢蹶爾一笑也時庚
寅元冥之小月二十有五日上林珠樹集啼鳥
阿閣斜陽下碧梧博局不成輸白帝聘錢無藉

貫黃姑投壺玉女知天笑竊藥姮娥爲月孤漢
斷禁垣芳草地滴殘清淚到蘼蕪霧縠森沈宮
扇迴屬車輾輾殷輕雷江長海濶欺魚素地老
天荒信鳩媒裏上啞看成紺碧懷中泣忍化瓊
瑰可憐銀燭風前淚畱取胡僧認劫灰搥鼓吹
簫罷後庭書帷別殿冷流螢宮衣蛺蝶晨風舉
畫帳梅花夜月停銜壁金釭憐旖旎翻階紅藥
笑娉婷水天閒話天家事傳與人間總淚零銀
漢依然界玉清竹宮香蕙露盤傾石碑銜口誰
能語棋局中心自不平禊日更衣成故事秋風

純扇憶前生寒窗擁髻悲啼夜暮雨殘燈識此
情

嘉議大夫按察司使江公墓誌銘 贈李峩居

御史

八年辛卯四十三歲

巨寇劉文秀等踞滇黔吳三桂握重兵屯保寧久

無功四川巡撫郝浴劾其縱兵剽掠包藏異心未

幾東西川俱陷三桂棄保寧退走綿州浴聞警一

晝夜七馳檄邀三桂還賊薄保寧勢張甚浴以忠

義激發將士與賊戰大破之即密陳三桂跋扈狀

有雜感詩

元旦試筆 梅花菴同林若撫話雨聯句

德藻稿序

九年壬辰四十四歲

館嘉興之萬壽宮輯綏寇紀畧

欽定四庫全書總目提要綏寇紀畧十二卷 國朝吳

偉業撰偉業字駿公號梅村太倉人崇禎辛未

進士授翰林院編修入 國朝官至國子監祭

酒是編專紀崇禎時流寇迄於明亡分為十二

篇曰澠池渡曰車箱困曰真甯恨曰朱陽潰曰

黑水擒曰穀城變曰開縣敗曰汴渠墊曰通城
擊曰鹽亭誅曰九江哀曰虞淵沈每篇後加以
論斷其虞淵沈一篇皆紀明末災異與篇名不
相應考朱彝尊曝書亭集有此書跋云梅村以
順治壬辰舍館嘉興之萬壽宮輯綏寇紀畧久
之其鄉人發雕是編僅十二卷而止虞淵沈中
下二卷未付棗木傳刻明史開局求天下野史
盡上史館於是先生足本出予鈔入百六叢書
歸田之後爲友人借失云云意者明末降闖勸
進諸臣子孫尙存故當時諱而不出與此本爲

康熙甲寅鄒式金所刻在未開史局之前故亦
闕虞淵沈中下二卷彝尊百六叢書爲人借失
者雖稱後十八年從吳興書賈購得今亦不可
復見此二卷遂佚之矣彝尊又稱其以三字標
題仿蘇鶚杜陽雜編何光遠鑑戒錄之例考文
章全以三字標題始於繆襲魏鏡歌詞鶚光遠
遂沿以著書偉業叙述時事乃用此例頗不免
小說纖仄之體其回護楊嗣昌左良玉亦涉恩
怨之私未爲公論然紀事尙頗近實彝尊所謂
聞之於朝雖不及見者之確切而終勝草野傳

聞可資國史之采輯亦公論也

按近有虞山張氏刻本
虞淵沈中下二卷全

先生所著有春秋地理志春秋氏族志緩靖紀

聞復社紀事秣陵春樂府梅村詩話鹿樵紀聞

諸書

又有臨春閣通
天臺兩種樂府

附徐 鈞 詞苑叢談吳祭酒作秣陵春一名雙影

記嘗寒夜命小鬟歌演自賦金人捧露盤一詞

黃東崖所謂法曲淒涼者正謂此詞也祭酒又

自題一律云詞客哀吟石子岡鷓鴣清怨月如

霜西宮舊事餘殘夢南內新詩總斷腸漫濕青

衫陪白傅好吹玉笛問甯王重翻天寶梨園曲

減字偷聲柳七郎

按詩集中逸又考先生寄房
師周芮公詩自注云晉江黃

東崖先生和予此詩中一聯曰徵書鄭重眠
餐損法曲淒涼滄淚橫知已之言讀之感嘆

唐 孫華 讀梅村先生鹿樵紀聞有感一旅誰知

扼紫荆蝸蟾聒耳正分爭腹書競伏狐鳴火手

蔗頻驚鶴唳兵直待臨危思翦牧可應先事戮

韓彭石頭袁粲真堪惜自壞邊關萬里城

指東莞督

師

哭朱昭芭

明鏞 有朱昭芭墓誌銘

與蒼公會 先生詩話蒼雪師雲南人與維揚汰

如師生同年月日相去萬里而法門兄弟氣誼最得蒼任中峯汰任華山人以比無着天親焉蒼公年老有肺疾然好談詩以壬辰臘月過草堂謂余曰今世狐禪盛行一大藏教將墜於地矣且無論義學卽求一詩人不可復得迺幸與子遇我襍被來不曾攜詩卷當爲子誦之是夜風雨大作師語音愴重撼動四壁痰動喉間咯咯有聲已呼茶復話不爲倦漏下三鼓得數十篇視階下雪深三尺矣當其得意軒眉抵掌慷慨擊案自謂於此證入不二法門禪機詩學總

一參悟其詩之蒼深清老沉着痛快當爲詩中第一不徒僧中第一也師和余西田賞菊詩有獨擅秋容晚節全全字落韻和者甚多無出師上王士正漁陽詩話近日釋子詩當以滇南讀徹蒼雪爲第一如一夜花開湖上路半春家在雪中山亂流落葉聲兼下聽徹寒扉不上關皆警句也

送林衡者佳璣歸閩有送林衡者還閩序并詩

先生詩話衡者少游黃忠烈之門以壬辰二月來婁東所著詩文詞數十卷詩蒼深秀渾古文

雅健有法其行也余贈以詩有五月關山樹影
圓送君吹笛柳陰船之句已而道阻再游吾州
則秋深木落鄉關烽火南望思親旅懷悲詫有
聽鐘鳴悲落葉之風焉

得侯朝宗

方域書

侯

方域

壯悔堂集與吳駿公

書十月朔日域再拜致書駿公學士閣下域凡
駑不材年垂四十無所表見然辱學士交游之
末者自甲戌以來今且二十年矣是時學士方
少年爲天子貴近臣文章德器傾動天下議者
謂旦夕入相屈指會幾何時而學士乃披裘杖

藜棲遲海濱歌彼黍之油油人生遭際信可悲
也然學士身隱而道彌彰域之美學士之披裘
杖藜也過於坐玉堂秉鈞軸遠甚近者見江南
重臣推轂學士首以姓名登之啟事此自童蒙
求我必非本願學士必素審無俟鄙言然而學
士之出處將自此分天下後世之觀望學士亦
自此分矣竊以爲達權救民有志匡濟之士或
不須盡守硜硜獨學士之自處不可出者有三
而當世之不必學士之出者有二試言之而學
士垂聽之學士以弱冠未娶之年蒙昔日天子

殊遇舉科名第一人其不可者一也後不數歲而仕至宮詹學士身列大臣其不可者二也清修重德不肯隨時俯仰爲海內賢士大夫領袖人生富貴榮華不過舉第一人官學士足矣學士少年皆已爲之今卽再出能過之乎奈何以轉眼浮雲喪我故吾其不可者三也昔狄梁公仕周耶律楚材仕元其一時君相皆推心置腹而聽信之然後堅忍委蛇僅能建豎兩人心迹亦良苦矣今不識當路之待學士果遂如兩人否其不必者一也卽使果如兩人矣而一時附

風雲輔日月何患無人學士前代之遺老也譬有東鄰之寡見西家財業浩大孤弱顛連自負能爲之綜理願入其室而一試焉其後子仰母慈奴婢秉主威果如所操信則西家之健婦也顧其若東鄰何其不必者二也凡此三不可二不必亦甚平常了然易見然時一念之逢萌梅福不過如此不然則怨猿鶴而負松桂北山咫尺耳學士天下之哲人也豈不爭此一閒耶十年以還海內典型淪沒殆盡萬代瞻仰僅有學士而昔時交游能稍稍開口者亦惟域尚在故

註作正行

梅村先生年譜卷三

再四踟躕卒不敢以不言萬一有持達節之說
陳於左右者願學士審其出處之義各有不同
堅塞兩耳達甚域經患難後乃知昔日論著都
無所解今願學為古文并近日詩歌澄江返棹
後當圖樽酒一細論之先生懷古兼弔侯朝宗
詩死生總負侯嬴諾欲
滴椒漿淚滿尊自注云朝宗貽書約終
隱不出余為世所逼有負夙諾故及之

吳梅村先生年譜卷三終

吳梅村先生年譜卷四

十年癸巳四十五歲

春禊飲社集虎邱

程穆衡

先生詩箋癸巳春社

九郡人士至者幾千人第一日慎交社為主慎
交社三宋為主右之德宜疇三德宏既庭實穎
佐之者尤展成侗彭雲客灑也次日同聲社
為主同聲社主之者張素文在茲佐之者趙明
遠炳沈韓倬世奕錢宮聲仲諧王其長發也太
倉如玉維夏吳郁計登禾周子淑肇則聯絡兩
社者凡以繼張西銘虎邱大會 壬夏禊抄癸

梅村先生年譜卷四

巳春同聲慎交兩社各治具虎阜申訂九郡同人至者五百人先一日慎交爲主次日同聲爲主又會日以大船廿餘橫亘中流每舟置數十席中列優倡明燭如繁星俗人數部聲歌競發達旦而止散時如奔雷瀉泉遠望山上似天際明星晶瑩圍繞諸君各誓於關帝前示彼此不相侵畔王隨菴撰自訂年譜十年上巳吳中兩社並興慎交則廣平兄弟執牛耳同聲則素文韓倬宮聲諸公爲之領袖大會於虎邱奉梅村先生爲宗主王梅翁賦禊飲社集四首同人

傳誦次日復有兩社合盟之舉山塘畫舫鱗集冠蓋如雲亦一時盛舉拔其尤者集半塘寺訂盟四月復會於鴛湖從中傳達者研德子俶兩人專爲和合之局是秋九月梅翁應召入都實非本願而士論多竊議之未能諒其心也

九月應召入都授秘書院侍講奉敕纂修孝經演義等升國子監祭酒時先生杜門不通請謁當事有疑其獨高節全名者會詔舉遺佚薦剡交上有司敦逼先生控辭再四二親流涕辦巖攝使就道難傷老人意乃扶病出山

按墓表溧陽海寧兩陳相國共

力薦先生州縣志皆載有投贈督府馬公自嘆江
總督馬國柱疏薦先生
樓別字令弟時字令送先生北行至鎮江賦別而作登上方橋有感

鍾山臺城國學觀象臺雞鳴寺功臣廟元武湖秣
陵口號遇南廂園叟感賦八十韻淮陰有感將至
京師寄當事諸老高郵道中途中遇雪卽事言懷
臨清大雪阻雪諸詩

胡彥遠介送吳梅村被徵入都海外黃冠舊有
期難教遺老散清時身隨杞宋留文獻代閱商
周重鼎彝滿地江湖傷白髮極天兵甲憶烏皮
重來簪筆承明殿記得揮豪出每遲幕府徵書

日夜催宮開碣石待君來歸心更度桑乾水伏
櫪重登郭隗臺花萼春迴新侍從風雲氣隱舊
蓬萊暮年詩賦江關重輸却城南十里梅一樽
雨雪坐冥濛人在汪洋千頃中老驥猶傳空冀
北春鴻那得久江東榛荅過眼成虛谷禾黍關
心拜故宮我亦吹簫向燕市從今敢自惜途窮
碧海黃塵事有無此來風雪滿燕都遺京節度
新推轂盛世朝廷倍重儒花暗鳳池思劍珮春
深虎觀夢江湖悲歌吾道非全泯坐有荆高舊

酒徒

十一年甲午四十六歲

官京師有病中別孚令弟時孚令省先生於京及師南歸言別而作

再寄三弟詩前詩意有未盡故出京後再寄之掛冠之志不覺情見乎詞

送穆苑先南還 壽總憲龔公芝麓 送湘陰

沈旭輪謫判深州 送天台何石湖之官臨晉

兼簡蒲州道嚴方公 送永城吳令之任 送

李書雲蔡閬培典試西川 送山東耿中丞青

藜 送顧壽來典試東粵

十二年乙未四十七歲

送隴右道吳贊皇之任 贈馮訥生進士教授雲中

十三年丙申四十八歲

春

上駐蹕南苑閱武行蒐禮召廷臣恭視賜宴行宮先生

賦五七言律詩五七言絕句每體一首應 制

聖駕幸南海子遇雪大獵先生恭紀七律一首

午日 賜宴瀛臺龍舟

海寇犯鎮江有江上詩

海寧陳相國謫戍遼陽有贈遼左故人詩

哭蒼雪法師有詩

宛陵施愚山 閨章 提學山東送之以詩 施 閨章

夢愚堂銘施子返自粵西載懼憂感除服北征
宿於青州之官舍庭月皎然酒酣就睡若有見
焉頽然而長黝然而黑長袖青衣袒胸跣足持
半刺署愚山道人四字時順治乙未三月之望
日也至京師以告侍讀學士龍眠方先生答曰
嘻殆子之前身也因呼余曰愚山子迄明年拜
命督山東學抵青州駐節於斯開帙視郡志地
故有愚公谷乃失笑曰向所夢者其斯人耶

馬逢知

爲松江提督有茸城行客談雲間師坐中

事詩

董含

三岡識畧馬逢知初名進寶起家羣

盜由浙移鎮雲間貪橫僭侈百姓殷實者械至
倒懸之以醋灌其鼻人不堪無不罄其所有死
者無算復廣佔民廬縱兵四出劫掠時海寇未
靖逢知密使往來江上之變先期約降要封王
爵反形大露事定科臣成公肇毅特疏糾之朝
廷恐生他變溫旨徵入繫獄妻女發配象奴未
幾與二子伏法東市當逢知之入覲也珍寶二
十餘船金銀數百萬他物不可勝紀綿亘百里
及死無一存者人皆快之

約齋公舉鄉飲大賓

州守三韓白公

登明 遴邑

中耆碩七人賓於庠備養老之禮首前浙江布

政使松霞顧公燕諭時年七十四歲次約齋公

時年七十三歲次前太常寺卿煙客王公時敏

次前嘉湖兵備道魯岡吳公克孝次同官縣知

縣梅梁曹公有武次前河間府知府約菴凌公

必正次前新都縣知縣攝六黃公翼聖以次為

序為婁東七老他爵位高而名德弗逮者不與

焉白公尊禮婁東七老啟嘗稽養老之典肇

自虞庠介壽之詩奏於幽雅蓋敬老近父國雍

有醬醕之文而序賓以賢閭里成仁讓之化然

而世多涼行商芝徒翼漢儲時際代遷渭璜疇

襄周鼎求其鴻冥儀世一時星聚太邱鮒背維

祺百世風師大雅蓋其鮮矣睠茲婁東三吳之

名州而忠哲之淵藪也鸞翔鳳舉仕版蔚為聲

施豹隱鱗潛川林毓多大老方伯顧公名著价

藩心懷肥遯鯉庭之昌後叶其作求塵尾之宗

雷讓其領袖封君吳公經啟振麟情怡盟鷺既

儀一而心結更抱冲而揚和太常王公世襲簪

纓心棲元淡齊家飭肅雍之範宜爾多賢禮人

被光霽之風羣推長者憲副吳公澤咏召棠清

甘原牖朱絃玉尺禊躬無愧直方丹篆青編好
學尚勤切琢邑尹曹公花封解綬門高五柳之
風蕨境垂簾字藹三芝之秀憲副凌公榮謝桂
林性耽松壑徜徉自得不緇城市之塵翰墨競
珍獨步風華之蘊州牧黃公明月入懷清風振
世樂推爲善踵太邱之遺徽心徹禪宗埽辟支
之小乘此七老者咸先世之逸民海邦之耆碩
也雖行不同軌而齒皆遐齡久心寫於式閤茲
身親夫授几十月初吉鄉飲屆期叙請諸老用
光大典初歌鹿鳴之詩志乞言也嗣歌南山之

詩祝壽考也旣歌淇澳之詩揚進德也考鐘伐
鼓圍視聽於橋門崇齒尚賢隆賓饌於杖履大
禮旣成列耆載宴瞻斗杓之有七熠熠台光稱
達尊之有三巍巍嶽望年日耄而德日劭國有
老成之型懦可立而頑可廉風登仁壽之域將
見香山之九老不獨擅美千秋而洛社之羣英
亦可匹芳百禩矣此固一鄉之盛亦有司之光
也謹將七老姓氏齒爵錄於左方以詔來茲焉
思義先方伯松霞公日記云十月朔日乙亥大
霽大暖如暮春赴州守鄉飲之席圍橋門而觀

梅村白雲

聽者萬人共詫以為盛舉豈知吾胸中黍離麥秀之感也

嗣母張太孺人卒於家

陳廷敬先生墓表奉嗣

母之喪南還

上親賜丸藥撫慰甚至王崇

簡吳母張太孺人墓誌銘先生始生時朱太孺

人尚育三歲子太孺人念其勞瘁從襁褓中乳

字先生及夫顧復醫禱恩義真切此太孺人每

以無忘撫育恩詔先生也況太孺人之歸文王

公也訓有錢孺人未周歲之遺女以至嫁而歿

勤劬周恤人不以為繼母也殆其性之者與按

太孺人世為婁東望族明經張柏菴公其父也

迨歸文玉公為繼室文玉公入繼大宗為玉田

公後歲時思慕孝祀不衰與朱太孺人事其姑

四十年將承恐後而妯娌之間和藹相終始雖

雖如也當先生趨召太孺人固康疆無恙也

而眷戀若永訣屬先生異日無忘我夫婦之事

嗣父母者嗚呼此先生之所以念之而猶悲也

太孺人之生明萬歷辛巳年六月二十二日而

其卒也順治丙申年十月初十日享年七十有

六嗣子偉業即梅村先生也

送何魯菴出守贛州 送何省齋
送舊總憲饒孝升以上林苑監
出使山東 送程太史翼蒼請姑
蘇學博 送郭宮贊次菴謫官
山西以曹秋岳以左司農遷廣
東左轄 送王籍茅學士按察浙
江 送當湖馬觀揚備兵奇嵐
送王孝源備兵山西

十四年丁酉四十九歲

二月歸里 王隨菴自訂年譜十四年春吳梅翁
以大司成告歸 先生剡城曉發詩他鄉已過
故鄉遠屈指歸期二月頭

州守三韓白公 登明 濬劉家河先生為記 按記集中逸見

縣志 有答撫臺開劉河書 顧士璉 婁江志州守白

公督工河上單騎巡行一日值天晚欲借宿民
家思民間俗忌不利官府到家徘徊道傍而民
亦閉戶不納適金粟菴僧來迎乃止於菴明日
以白金一兩酬僧於是民皆願公來宿而公以

布帳隨身竟露栖矣

張敕菴黃門五十壽序 聖恩寺藏經閣記

十五年戊戌五十歲

科場事發吳漢槎 兆騫 孫赤崖 陽 陸子元 慶曾 俱

貸死戍邊有悲歌贈吳季子贈陸生吾谷行 程

穆衡 輦悅卮談同時如吳江吳漢槎兆騫常熟

孫赤崖暘長洲潘逸民隱如桐城方與三育盛
皆有高才盛名同以科場事貸死戍邊子元以
機雲家世與彞仲大樽為輩行輾軻三十年至
垂老乃博一舉復遭誣以白首禦窮邊而死一

妾挈幼子牽衣袂行路盡爲流涕 汪琬 堯峯

文鈔王辰權貴人與考官有隙謀因事中之於是科場之議起指摘進士首名程周量經義被黜科場之議日以益熾其端發於是科而其禍及於丁酉士大夫糜爛潰裂者殆不可勝計

蔣良騏

東華錄九年三月大學士范文程等言

會試中式第一名舉人程可則文理荒謬首篇尤悖戾經註命革中式並治考官罪十四年十月同考官李振鄴張我樸舉人田耜鄔作霖科臣陸貽吉等俱立斬家產籍沒父母兄弟妻子

流徙尙陽堡給事中任克溥劾其賄買中式訊實故也十五年二月以賄買情弊覆試丁酉科順天舉人朱漢雯等內蘇洪濬等八名文理不通革去舉人三月諭禮部丁酉科中式江南舉人物議沸騰是以親加覆試今取得吳鳴珂准同會試中式舉人一體覆試其汪溥勛等七十四名仍准作舉人史繼佚等十四名罰停會試二科方域等十四人文理不通着革去舉人十一月刑部審實江南鄉試作弊奉 旨主考方猶錢開宗正法同考官葉楚槐等卽處絞

本木全言月
本木全言月

壽房師李太虛先生 房師李太虛先生壽序

白封君六十壽序 贈奉直大夫戶部福建

清吏司員外郎仲常費公墓誌銘 張母潘孺

人暨金孺人墓誌銘 劉母耿淑人墓誌銘

十六年己亥五十一歲

六月鄭成功陷鎮江七月犯江寧復犯崇明

春游石公山 秋遊虞山

少保大學士王文通公神道碑銘 太僕寺少

卿席寧侯墓誌銘 謝天童孝廉墓誌銘

十七年庚子五十二歲

里居以奏銷事議處時邑中如顧伊人滑王惟夏吳黃庭表與堅同以奏銷註

堅觚集江南奏銷之獄起於巡撫朱國治

欲陷考功員外郎顧予咸株連一省人士無脫

者 蘇州府志庚子十二月吳縣知縣任唯初

山西石樓人選貢生池任卽逼倉總吳行之私糶漕糧七

百石婪賄虐刑口碑騰刺十八年二月 章

皇帝遺詔下府堂哭臨第三日生員倪用賓等

列款具呈巡撫朱國治發蘇松常道王紀卽提

吳行之等嚴訊供實覆院諸生發知府余廉徵

羈候府治花亭唯初回縣次日生員金人瑞丁

瀾等哭府學文廟教授程邑申報六案朱始摘
任印着本府看守土地祠唯初逢人說朱撫院
要我銀子故此糶糧朱遂以諸生驚擾哭臨意
在謀叛具疏銜在籍吏部考功員外郎顧子咸
株連之適差滿大臣至江寧審金壇叛招并訊
題覆部議覆准倪用賓沈玘顧偉業薛爾張姚
剛丁瀾金人瑞王重儒八人典刑家產入官妻
孥流徙張韓來獻祺丁觀生朱時若朱章培周
江徐玠葉琪唐堯治馮邨十人本身典刑其顧
子咸會議得疏中有諸生送揭子咸擲地不觀

之語所擬革職籍沒罪絞奉旨俱免唯初復任
後因白糧經費遲延部議降調國治復糾其貪
勘實絞決於省城未幾國治解任

八月至無錫訪同年吳永調其馴有有感賦贈詩
哭亡女 亡女權厝志 清涼山讚佛詩 七
夕感事 七夕卽事 送王子惟夏以牽染北

行 胃辟疆五十壽序

十八年辛丑五十三歲

雲南平 康熙元年四月有滇池饒吹

由榔死於雲南 本生母朱太淑人卒 文學博歸道病歿於桃源

縣

送張玉甲憲長之官印雅

康熙元年壬寅五十四歲

巡撫韓公

世琦

請撤蘇州駐防兵

按先生有大中丞心康韓公九

月還自淮南生日為壽詩

蘇州府志名宦韓世琦字心康本

蒲州人明大學士曠曾孫世琦隸旗籍為遼人

康熙元年由順天巡撫移撫江南懲前政之弊

加意拊循日進士民詢以利弊次第舉行崇明

瀕海居民遷內地者安輯不令失業所棄界外

田三千八百餘頃為奏免額賦萬九千餘石折

銀萬六千餘兩蘆課八千餘兩 國初年之江

南吳中特駐重兵以防寇盜北來軍士素驕橫

為民患至是世琦奏言江南寧謐力請調回及

撤回之日慮其擾民與統兵者約令嚴加禁戢

躬率文武將吏往來巡視無一人敢干令者三

年夏瀕海太倉等州縣颶風大作漂沒民田廬

舍萬計親往勘實奏蠲其稅七年吳中大水饑

殍載途世琦繪圖入告始得蠲賑嘗疏請減免

蘇松浮糧詳田賦類事雖不行民甚德之居八年以

各屬逋賦被議去

子暲生

字元朗號西齋康熙戊辰進士由戶部主事遷兵科給事中入直武英殿充書畫

譜纂修官著有西齋集左司筆記錦溪小集

太倉州志吳駿公偉

業連舉十三女而子暲始生時唐東江孫華為

名諸生年已及強立矣赴湯餅宴居上坐駿公

戲曰是子當與君為同年唐意佛後戊辰暲舉

禮部唐果同榜

贈蘇郡副守涪陵陳三石 贈松郡司李內江

王擔四 贈彭郡丞益甫 敕贈大中大夫盧

公神道碑銘

二年癸卯五十五歲

本生父約齋公卒

子隣生

字中麗能詩早卒

白瀟沈公

受宏

受詩法於先生

見外高祖白瀟詩集自註

僉憲梁公西韓先生墓誌銘

三年甲辰五十六歲

子暄生

字少融歷知壽光壽張縣有政績亦能詩

著花韻軒集退齋詩集攷先生三子俱側室朱安人出

顧西巘侍御招集虎邱有夜游虎邱顧西巘侍御

同沈友聖虎邱卽事西巘顧侍御招同沈山人友

聖虎邱夜集作圖記事因賦長句諸詩

香山白馬寺巨冶禪師教公塔銘

顧母陳孺

人八十壽序

四年乙巳五十七歲

錢臣辰五十壽序 監察御史王君慕吉墓誌

銘

五年丙午五十八歲

魯謙菴使君以雲間山人陸天乙所畫虞山圖

索歌成二十七韻 兵科給事中天愚謝公墓

誌銘

江西巡撫韓公奏議序

六年丁未五十九歲

三月二十四日從山後過湖宿福源精舍 二

十五日偕穆苑先孫浣心葉予聞允文游石公

山盤龍石梁寂光歸雲諸勝 游石公歸是夜

驟雨明晨微霽同諸君天王寺看牡丹 沈文

長雨過福源寺

七年戊申六十歲

吳園次綺以書招先生先生之吳興

上已過吳興家園次太守招飲郡圃之愛山臺

座客十人同修禊事余分韻得苔字 立夏日

陪園次郡伯過孫山人太白亭落成置酒分韻

得人字 贈湖州守家園次五十韻 修孫山

人墓記 雲起樓記 湖州峴山九賢祠碑記

和木全譜卷四

席處士允來墓誌銘

蔣母陳安人墓誌銘

靈隱具德和尚塔銘

席處士允來墓誌銘 蔣母陳安人墓誌銘 靈隱具德和尚塔銘

編詩文集四十卷成及門周子淑 肇 王維夏 吳許

九日 旭 顧伊人 淵 校讐付梓陳確菴 瑚 為之序

御製題吳梅村集梅村一卷足風流往復搜尋未肯休
秋水精神香雪句西崑幽思杜陵愁裁成蜀錦應慚麗
細比春蠶好更抽寒夜短檠相對處幾多詩興為君收
欽定四庫全書總目提要梅村集四十卷 國朝吳偉

業撰偉業有綏寇紀畧已著錄此集凡詩十八
卷詩餘二卷文二十卷其少作大抵才華豔發

吐納風流有藻思綺合清麗芊眠之致及乎遭
逢喪亂閱歷興亡激楚蒼涼風骨彌為道上算
年蕭瑟論者以庾信方之其中歌行一體尤所
擅長格律本乎四傑而情韻為深叙述類乎香
山而風華為勝韻協宮商感均頑豔一時尤稱
絕調其流播詞林仰邀 睿賞非偶然也至
於以其餘技度曲倚聲亦復接跡屯田嗣音淮
海王士禎詩稱曰白髮填詞吳祭酒亦非虛美
惟古文每參以儷偶既昇齊梁又非唐宋殊乖
正格黃宗羲嘗稱梅村集中張南垣柳敬亭二

海王士禎詩

七

傳張言其藝而合於道柳言其參寧南軍事比
之魯仲連之排難解紛此等處皆失輕重爲倒
却文章家架子其糾彈頗當蓋詞人之作散文
猶道學之作韻語雖強爲學步本質終存焉然
少陵詩冠千古而無韻之文率不可讀人各有
能有不能固不必一一求全矣

按先生詩有程穆衡吳詩箋七卷靳榮藩吳
詩集覽二十卷吳翌鳳吳詩箋注十八卷

八年已酉六十一歲

楚蘄盧統爲先生丙子典試所取士來爲蘇松常
鎮參政及門諸子屬序先生詩文集

沈德潛

書梅村集後蓬萊宮裏舊仙卿自別書

山梅遠行擬作栩陽離別賦江南愁殺庾蘭成

吳祖修

書梅村詩後夢回龍尾醒猶殘重入

春明興轉闌宣去何能如老鐵放歸未許戴黃
冠悲歌自覺高官誤讀史應知名士難今日九
泉逢故友西臺涕淚幾時乾

附

婁東耆舊傳梅村公得瑯琊賁園稱莘莊改

構廓然堂甫竟而卒門人楚人盧統來爲蘇松
巡道升堂公母朱太淑人不時出盧詢之公對
以後樓未建故去內舍甚遙盧卽建樓其後翼

然與堂稱斯亦非近今人所能也

思義王書

城瑞國為

士驎

傳云性喜多費興作無虛日然

考是園不為侈廓然堂則其長子慶長瑞庭俗呼大癡者為之慶長性似父而汰尤甚廓然既構矣不當意立命拽毀之再構又然至三始成有楊某者度其不能繼也乃竊量堂之規模構一樓於已宅觀王急則購以移焉閱二十餘年王果敗而楊亦破家是堂及園遂為吳有然樓猶屬楊也又幾年梅村門生某或云糧儲為買之置堂後果稱無爽造物之幻如是今堂與

樓皆為瓦礫場矣

九年庚戌六十二歲

探梅鄧尉有梅信日雨過鄧尉哭剖石和尚遇大雪夜宿還元閣詩

京江送遠圖歌

吳郡唐君合葬墓誌銘

太

學張君季繁墓誌銘

封徵仕郎翰林院檢討

端陽孫公暨鄒孺人合葬墓誌銘

錢母譚太

君六十壽序

龔芝麓詩序

十年辛亥六十三歲

感舊贈蕭明府

十二月二十四日先生卒門人顧澹撰行狀

先生元旦夢至一公府主者王侯冠服降階迎揖出片紙非世間文字不可識謂先生曰此位屬公矣十二月朔復夢數人來迎先生書期日示之

王士正池北偶談吳駿公辛亥元旦夢上帝召

爲泰山府君是歲病革有絕命詞云忍死偷生廿載餘而今罪孽怎消除受恩欠債須填補縱比鴻毛也不如時浙西僧水月年百餘歲能前知先生病亟始拏舟迎之至則曰公元旦夢告之矣何必更問老僧遂卒

先生屬疾時作合書乃自叙事畧曰吾一生遭際萬事憂危無一刻不歷艱難無一境不嘗辛苦實爲天下大苦人吾死後歛以僧裝葬吾於鄧尉靈岩相近墓前立一圓石曰詩人吳梅村之墓

先生病中有感詞調寄賀新郎萬事催華髮論龔生

天年竟天高名難沒吾病難將醫藥治耿耿胸中熱血待灑向西風殘月剖却心肝今置地問華佗解我腸干結追江事倍淒咽故人慷慨多奇節爲當年沈吟不斷草間偷活艾灸眉頭瓜噴鼻今日須難訣絕早患苦重來千疊脫屣妻

孥非易事竟一錢不值何須說人世事幾完缺

沈受宏白漢集哭梅翁師茫茫滄海劫餘身遺

恨心肝抱苦辛自說三徵蒙 聖代未輕一死

為衰親南朝宮闕悲瓊樹北極衣冠記紫宸留

得茂陵末命在西山題墓作詩人四首錄一

五十二年癸巳葬蘇州郡治西南三十里西山之麓

澤州陳廷敬譔墓表

蘇州府志 國朝祭酒吳偉業墓在靈岩山麓按

在蘇州府吳縣元墓山之北

袁簡齋太史稱婁東詩人壽有弇州後有梅郵向

不數幸其豈

良神博識

蘊衡樹賦尚冬

良神博識

草並為默即非雉

良神博識

雖為季節四卷中首卷中中寒信數今日墓門皆

蘇平北則自壬辰歲以交八閏寒暑稟凡十禮是

口信釐穴拱發發付此寶之不毒翅快生

薄介人兩寒到中改筆凡有季日可辭

不識固則豈為蘇蘇之舉簡決生特神

良神博識宮曾聽食山人季簡斷辨漁我生季

見錢竹汀宮詹謨弇州山人季譜獨梅郵先生季

音不揣固陋謬為續貂之舉讀先生詩輒

斬介人兩家注中近事凡有季月可稽

名記釐次壽後復於汎覽之下事陟先生

編季比附自壬辰迄己亥八閱寒暑橐凡十數易

輯為季譜四卷中有家仁仲參訂處今已墓門宿

草並為標明非敢

蠡測掛漏尚多
汪莊之例也所恨管窺

不逮幸甚
免惟冀博雅君子匡以
月師對識

之亂版片盡毀